

MESYUARAT KEDUA, PENGGAL KETIGA  
PARLIMEN KEEMPAT BELAS  
2020

**HARI ISNIN : 24 OGOS 2020**

**JAWAPAN-JAWAPAN BAGI PERTANYAAN-PERTANYAAN JAWAB**  
**LISAN YANG TIDAK DIJAWAB DI DALAM DEWAN**  
**( SOALAN NO. 10 HINGGA NO. 45 )**

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN LIM KIT SIANG [ ISKANDAR PUTERI ]**

**TARIKH : 24 OGOS 2020 (ISNIN)**

**SOALAN**

**TUAN LIM KIT SIANG [ ISKANDAR PUTERI ]** minta **PERDANA MENTERI** menyatakan sama ada Kementerian telah memastikan setiap seorang jemaah Menterinya menerima, menghormati dan mendukung semangat-semangat Rukun Negara dan sama ada beliau bersedia untuk membuang mana-mana Menteri yang tidak menjunjung semangat Rukun Negara.

**JAWAPAN : [YB DATO' TAKIYUDDIN BIN HASSAN, MENTERI DI JABATAN PERDANA MENTERI (PARLIMEN DAN UNDANG-UNDANG)]**

Tuan Yang di-Pertua,

Untuk makluman Ahli Yang Berhormat, untuk benar-benar memahami Rukun Negara kita perlu kembali ke teks asalnya yang jarang dibincangkan secara terbuka kerana yang sering disebut-sebut hanyalah sebahagiannya sahaja, iaitu adalah LIMA Prinsip Rukun Negara.

Dari asalnya RUKUN NEGARA mengandungi dua bahagian yang sama penting dan saling bergantung. Misalnya, Bahagian pertama ialah Mukadimah. Di dalamnya dirakamkan LIMA cita-cita negara Malaysia mengenai perpaduan, demokrasi, kemakmuran negara, mempertahankan berbagai tradisi budaya dan membina masyarakat progresif menggunakan sains dan teknologi. Bahagian in adalah roh kepada Rukun Negara.

Manakala, Bahagian kedua ialah Prinsip Rukun Negara iaitu ikrar rakyat Malaysia untuk menumpukan seluruh tenaga dan usaha bagi mencapai LIMA cita-cita yang tersenarai dalam Mukadimah berasaskan LIMA prinsip berikut:

*Kepercayaan Kepada Tuhan  
Kesetiaan Kepada Raja dan Negara  
Keluhuran Perlembagaan  
Kedaulatan Undang-Undang; dan  
Kesopanan dan Kesusilaan*

Maka RUKUN NEGARA yang mengandungi MUKADIMAH dan PRINSIP ini telah diisytiharkan pada 31 Ogos 1970 dan semenjak itu telah diterima dan dihayati oleh rakyat di semua lapisan masyarakat Malaysia, termasuk semua Ahli Parlimen, Jemaah Menteri dan semua rakyat, tua dan muda.

Ternyata ianya merupakan satu falsafah, ideologi yang mengandungi prinsip-prinsip murni untuk jadi panduan dan ikutan bukan suatu peraturan dan perintah, seperti undang-undang. Penghayatan RUKUN NEGARA biar pun diangkat oleh pemerintahan Malaysia sebagai sesuatu yang utama, proses penghayatannya berlaku di dua peringkat. Peringkat pertama di paras peribadi untuk mengisi nilai dan amalan seseorang. Peringkat kedua adalah secara kolektif, di mana rakyat beramai-ramai sebagai keluarga dan komuniti sama-sama menghayati dan mengamalkan prinsip-prinsip RUKUN NEGARA.

Dengan itu, keseluruhan penghayatan RUKUN NEGARA dialami dengan mendalam oleh semua lapisan rakyat. Oleh itu, dalam sistem demokrasi di Malaysia, tiada siapa yang boleh dihukum kalau tidak menerima, menghormati dan mendukung semangat RUKUN NEGARA. Namun, RUKUN NEGARA adalah Rukun Perpaduan yang mengikat rakyat dengan segala usaha perpaduan di seluruh negara kerana RUKUN NEGARA adalah cita-cita negara.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN ROBERT LAWSON CHUAT  
[BETONG]**

**TARIKH : 24 OGOS 2020 (ISNIN)**

**SOALAN**

**TUAN ROBERT LAWSON CHUAT [ BETONG ]** minta **MENTERI KESIHATAN** menyatakan adakah Kementerian merancang untuk menaiktaraf Hospital Betong dalam masa terdekat ini.

**JAWAPAN**

**Tuan Yang di-Pertua,**

1. Hospital Betong merupakan hospital tanpa pakar dengan kapasiti 48 buah katil dan ianya telah mula beroperasi sejak tahun 1992. Kadar penggunaan katil (BOR) adalah 40% bagi tahun 2019. Bagi memberikan keselesaan kepada pesakit, dua kerja menaiktaraf Hospital Betong telah berjaya disiapkan pada tahun 2019 iaitu:

a) Kerja penggantian sistem perpaipan seluruh hospital;  
dan

b) Kerja menaiktaraf Unit Kecemasan.

2. Selain itu, Hospital Betong telah menerima sumbangan berjumlah RM 500 ribu daripada Perbadanan Nasional Berhad (PNB) untuk menaiktaraf Unit Hemodialisis hospital.

3. Setakat ini, perancangan KKM untuk Hospital Betong adalah untuk memantapkan perkhidmatan sedia ada iaitu melalui lawatan pakar Onkologi, Pembedahan, Orthopedik, Katarak, Pediatrik, Obstetrik & Ginekologi serta Psikiatri.

4. Buat masa ini, Jabatan Pesakit Luar serta Klinik Ibu dan Anak masih beroperasi di Hospital Betong. Keutamaan dalam masa terdekat ini adalah untuk membina Klinik Kesihatan di bandar Betong bagi mengurangkan kesesakan di hospital. Tanah seluas 6.094 ekar telah pun diperolehi bagi pembinaan KK di bandar Betong.

5. Justeru, Kementerian Kesihatan Malaysia akan sentiasa memantau dan berusaha menambahbaik keperluan hospital untuk memastikan perkhidmatan kesihatan dapat diberikan dengan baik.

Sekian, terima kasih.

**PEMBERITAHUAN PERTANYAAN DEWAN RAKYAT,  
MESYUARAT KEDUA, PENGGAL KETIGA,  
PARLIMEN KEEMPAT BELAS  
TAHUN 2020**

**PERTANYAAN : LISAN**

**DARIPADA : TUAN NIK NAZMI BIN NIK AHMAD  
(SETIAWANGSA)**

**TARIKH : 24 OGOS 2020 (ISNIN)**

**SOALAN**

Minta **MENTERI PERTAHANAN** menyatakan :-

- (a) jumlah penjualan / pelupusan aset Boustead Holding Berhad (BHB) setiap tahun antara 2008 hingga 2020; dan
- (b) jumlah pinjaman yang diambil oleh BHB setiap tahun antara 2008 hingga 2020.



**JAWAPAN**

Tuan Yang di-Pertua,

Sebagai sebuah syarikat konglomerat, Boustead Holdings Berhad (Kumpulan Boustead) terlibat di dalam pelbagai aktiviti berkaitan pembelian dan penjualan aset bagi meningkatkan nilai komersil Kumpulan.

Kumpulan Boustead juga turut sama aktif di dalam pasaran modal bagi membiayai keperluan modal kerja (working capital) serta untuk membiayai pembiayaan modal (capital expenditure) yang diperlukan oleh syarikat-syarikat di bawah Kumpulan Boustead.

Sepanjang tahun 2008 hingga Mac 2020, Kumpulan Boustead telah membuat beberapa pelupusan aset sebanyak RM2.7 bilion.

Dari aspek pinjaman pula, dari tahun 2008 sehingga Mac 2020, jumlah pinjaman Kumpulan Boustead telah meningkat dari RM3.4 bilion ke RM7.9 bilion, iaitu peningkatan sebanyak RM4.5 bilion. Peningkatan ini telah disumbangkan oleh peningkatan kumulatif pinjaman jangka panjang sebanyak RM2 bilion dan peningkatan kumulatif pinjaman jangka pendek sebanyak RM2.5 bilion.

Terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB DATUK ZAKARIA BIN MOHD. EDRIS  
@ TUBAU [ LIBARAN ]**

**TARIKH : 24 OGOS 2020 (ISNIN)**

**SOALAN**

Minta **PERDANA MENTERI** menyatakan pemantauan Kerajaan terhadap puluhan tabung atau bantuan kutip derma pandemik COVID-19 yang dilancarkan oleh badan NGO atau organisasi kerja amal dan persendirian, dan adakah dana yang dikumpul disalurkan kepada kumpulan tersasar.

**JAWAPAN**

**YB DATUK SERI MOHD REDZUAN BIN MD. YUSOF,  
MENTERI DI JABATAN PERDANA MENTERI (TUGAS-TUGAS KHAS)**

Tuan Yang Dipertua,

1. Kerajaan mengambil perhatian mengenai tabung dan bantuan kutipan derma untuk membantu pengurusan penularan COVID-19 yang diuruskan oleh pihak NGO dan organisasi lain. Di pihak Kerajaan pula, kita telah melancarkan Tabung COVID-19 di bawah Agensi Pengurusan Bencana Negara (NADMA) untuk menggalakkan syarikat swasta dan rakyat menyumbang bagi sama-sama membantu menangani pandemik tersebut.
2. Kerajaan memahami keprihatinan pelbagai pihak dalam memberi sumbangan sama ada dalam bentuk kewangan mahupun bukan kewangan termasuk barangan perubatan seperti pelitup muka, sarung tangan, ventilator dan sebagainya. Pihak NGO dan organisasi lain umumnya akan mendapatkan sumbangan kewangan atau sumbangan bukan kewangan daripada ahli mereka atau terbuka kepada rakyat. Sumbangan tersebut kemudiannya akan disalurkan kepada pihak hospital, agensi petugas barisan hadapan (*frontliners*) dan rakyat yang terkesan dengan pandemik tersebut. Setakat ini, kerajaan tidak menerima sebarang aduan penyalahgunaan sumbangan-sumbangan tersebut.
3. Dari segi pemantauan, Kementerian Kewangan (MOF) dan Lembaga Hasil Dalam Negeri (LHDN) telah menetapkan garis panduan yang perlu dipatuhi dalam pengurusan sumbangan seperti mana berikut:
  - i. Garis Panduan Khas Permohonan Potongan Cukai Pendapatan Bagi Projek Komuniti / Amal Untuk Menangani Wabak COVID-19; dan

- ii. Garis Panduan Permohonan Untuk Kelulusan di bawah Subseksyen 44 (11C) Akta Cukai Pendapatan (ACP) 1967 Bagi Tabung Relief COVID-19.

4. Bagi penubuhan tabung-tabung di bawah MOF dan LHDN ini, terdapat sistem permohonan, pendaftaran, semakan akauntabiliti, penguatkuasaan dan had tempoh telah disediakan bagi mana-mana entiti yang membuka Tabung COVID-19 bagi tujuan kutipan sumbangan serta potongan cukai kepada penyumbang.

5. Bagi entiti yang membuka Tabung COVID-19 dan tidak mengemukakan permohonan bagi pengecualian cukai, Surat Pekeliling Am, Jabatan Perdana Menteri Bilangan 6 Tahun 1987 (SPA JPM 6/1987) mengenai peraturan mengutip derma oleh pertubuhan dari orang ramai adalah terpakai. Di bawah surat pekeliling am ini, penguatkuasaannya terletak di bawah bidang kuasa Polis Diraja Malaysia, Pendaftar Pertubuhan dan Suruhanjaya Syarikat Malaysia.

6. Untuk makluman Ahli Yang Berhormat Libaran, MOF dan LHDN sedang menambahbaik prosedur dan kawal selia penubuhan tabung sumbangan yang meliputi bidang kuasa kerajaan negeri dan juga kaedah penutupan tabung serta penyaluran bakinya kepada Tabung Kumpulan Wang Amanah Bantuan Bencana Negara (KWABBN).

7. Kerajaan juga memberi nasihat agar orang ramai merujuk pihak berautoriti seperti MOF dan LHDN dan lain-lain agensi seperti mana garis panduan Surat Pekeliling Am JPM yang saya sebutkan tadi dan garis panduan yang dikeluarkan oleh MOF dan LHDN sebelum sebarang sumbangan dibuat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN SYED IBRAHIM BIN SYED NOH  
[ LEDANG ]**

**TARIKH : 24 OGOS 2020 ( ISNIN )**

**SOALAN**

Minta **MENTERI SAINS, TEKNOLOGI DAN INOVASI** menyatakan secara terperinci jangkaan manfaat yang akan dibawa oleh penubuhan Sandbox Teknologi dan Inovasi Nasional (NTIS) kepada syarikat permulaan dan usahawan teknologi tinggi.

**JAWAPAN**

Tuan Yang di-Pertua,  
Untuk makluman Ahli Yang Berhormat,

1. Penubuhan *National Technology & Innovation Sandbox* (NTIS) seperti yang diumumkan oleh YAB Perdana Menteri di bawah Pelan Jana Semula Ekonomi Negara (PENJANA) pada 5 Jun 2020 yang lalu akan mendorong perkembangan inovasi dan kreativiti dalam negara. Ianya merupakan pemangkin kepada usaha seperti pendigitalan penawaran perkhidmatan dan peningkatan kadar pengkomersialan produk tempatan, teknologi serta perkhidmatan penyelidikan dan pembangunan (R&D) baharu terutamanya daripada syarikat permulaan (*startup*) dengan izin dan usahawan teknologi tinggi tempatan.
2. Inisiatif ini diterajui oleh Kementerian Sains, Teknologi dan Inovasi (MOSTI) dan disokong oleh agensi-agensi di bawahnya seperti Malaysian Global Innovation & Creativity Centre (MaGIC), Malaysian Technology Development Corporation (MTDC), MIMOS Berhad (MIMOS) dan Technology Park Malaysia (TPM) dengan kerjasama Futurise Sdn. Bhd. (FUTURISE) yang menyelaras dan menjadi pemudah cara pelaksanaan inisiatif ini. NTIS turut melibatkan pembabitan dan sokongan daripada Agensi Kerajaan dan juga pemain industri daripada Sektor Swasta, Syarikat Multinasional, Perusahaan Kecil Sederhana (PKS) dan banyak lagi.
3. Inisiatif NTIS ini telah pun bermula dan pihak MOSTI menjalinkan kerjasama strategik dengan Kementerian Kesihatan Malaysia (KKM), Kementerian Perumahan dan Kerajaan Tempatan (KPKT) dan FELDA dalam mengenengahkan aplikasi teknologi robotik dan kecerdasan buatan (AI) yang dihasilkan oleh syarikat-syarikat tempatan di bawah seliaan MOSTI. Teknologi robotik tersebut telah direka cipta untuk menjalankan beberapa fungsi seperti nyahkuman, penghantaran makanan, ubat-ubatan, bahan buangan, lapik tilam dan sebagainya di Hospital Tunku Azizah, Kuala Lumpur.

4. MOSTI juga sedang bekerjasama dengan pihak KPKT untuk memperkenalkan penggunaan robot di pasar-pasar awam di Malaysia. Beberapa cadangan penyelesaian ke atas isu-isu di pasar awam seperti kebergantungan terhadap warga kerja asing, kebersihan, kesesakan, pengurusan sisa, pengurusan logistik dan sebagainya sedang diperhalusi dengan lebih lanjut melalui penggunaan robot, aplikasi e-dagang dan inisiatif pemodenan secara menyeluruh.

5. NTIS merupakan satu platform yang membolehkan syarikat permulaan (*start-up*), penyelidik, penggerak inovasi, Perusahaan Kecil Sederhana (PKS) dan usahawan berteknologi tinggi menguji produk, perkhidmatan, model perniagaan dan mekanisme penyampaian dalam persekitaran yang sebenar (*live environment*) dan dalam keadaan yang selamat dengan memberi kelonggaran daripada undang-undang dan peraturan sedia ada, secara umum atau khusus, untuk tujuan pembangunan teknologi dan produk menerusi penyelidikan. Inisiatif ini akan memberi tambah nilai terutamanya kepada syarikat *start-up* untuk terus memperbaiki produk untuk menuju kepada pengkomersialan. Hal ini sekaligus akan memberi keyakinan serta menyokong usaha pihak Kerajaan dalam mencapai *Gross Expenditure in Research and Development* (GERD) kepada 3.5% menjelang tahun 2030.

6. Selain itu, NTIS juga dijangka akan menggiatkan aktiviti pengkomersialan serta mengurangkan kebergantungan terhadap produk/teknologi/perkhidmatan import dan seterusnya mempersiapkan Malaysia sebagai Negara Berteknologi Tinggi (*High-Tech Nation*). Melalui inisiatif ini, kadar peningkatan peratusan pengkomersialan R&D dijangka 10% dalam tempoh 5 tahun yang akan datang. Selain itu, melalui inisiatif ini juga, dijangka kadar peningkatan peratusan teknopreneur berasaskan inovasi dapat mencapai 75% menjelang 2030 melalui penglibatan *start-up* dan usahawan teknologi tinggi.

7. Tambahan lagi, platform NTIS juga akan membuka peluang bagi produk/teknologi/perkhidmatan hasil R&D atau inovasi tempatan untuk dipertimbangkan dalam perolehan Kerajaan serta membuka ruang produk tersebut untuk berada di pasaran lebih cepat kerana melibatkan pembelian bukan sahaja oleh sektor awam, malahan pihak industri

sebagai pengguna. Penglibatan Kerajaan sebagai pengguna memberi isyarat dan jaminan bahawa produk/teknologi/ perkhidmatan hasil R&D atau inovasi tempatan daripada syarikat permulaan dan usahawan teknologi tinggi adalah berkualiti tinggi dan memberi keyakinan untuk digunakan.

8. Pelaksanaan NTIS ini akan merangkumi seluruh peringkat pembangunan bermula dari peringkat awalan, pertengahan dan pengembangan [*Technology Readiness Level* (TRL) 1 hingga 9]. Ini adalah bagi memastikan bahawa semua produk/teknologi/ perkhidmatan hasil R&D atau inovasi tempatan dapat disalurkan ke agensi fasilitasi yang berkaitan untuk pembangunan kapasiti yang bersesuaian serta sebagai langkah persediaan sebelum ke peringkat selanjutnya seperti peraturan di bawah *National Regulatory Sandbox* (NRS), kemasukan pasaran dan pembiayaan pengkomersialan.

9. Inisiatif ini juga dapat memastikan produk/teknologi/perkhidmatan hasil R&D atau inovasi tempatan baharu seperti dron, *autonomous vehicle* dan robotik lebih bersedia untuk pengesahan pasaran (*market validation*) yang dipantau oleh Agensi Pengawal Selia. Selain itu, NTIS bukan sahaja dapat mengurangkan halangan kemasukan ke pasaran, malahan dapat meningkatkan penglibatan industri pada tahap awal penyelidikan dan inovasi (R&I). Melalui kaedah ini juga, pihak industri dapat mengatasi masalah-masalah yang dihadapi melalui penyelesaian inovatif dan ini secara langsung meningkatkan penggunaan teknologi tempatan.

Sekian, terima kasih.



**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK SERI DR. HAJI DZULKEFLY BIN AHMAD [ KUALA SELANGOR]**

**TARIKH : 24 OGOS 2020 ( ISNIN )**

**SOALAN**

**DATUK SERI DR. HAJI DZULKEFLY BIN AHMAD [ KUALA SELANGOR]** minta **MENTERI KESIHATAN** menyatakan pendirian kerajaan dengan larangan merokok di restoran dan tempat awam seterusnya menyatakan sejauh mana tahap penguatkuasaan terhadap larangan tersebut. Adakah kerajaan akan mempertimbangkan untuk meringankan dengan meminda undang-undang berkait larangan merokok. Berapa kes telah diambil tindakan oleh penguatkuasa kesihatan.

**JAWAPAN**

**Tuan Yang di-Pertua,**

1. Pendirian Kementerian Kesihatan Malaysia (KKM) adalah untuk meneruskan penguatkuasaan larangan merokok di tempat makan (restoran) dan tempat awam di bawah Peraturan 11 (1) Peraturan-Peraturan Kawalan Hasil Tembakau (PPKHT) 2004 pindaan 2018. Pewartaan ini adalah selaras dengan komitmen Malaysia kepada Artikel 8, *WHO Framework Convention on Tobacco Control (WHO FCTC)* bertujuan melindungi orang awam daripada bahaya asap rokok dan produk merokok yang lain.
2. Berkaitan pertimbangan kerajaan untuk meringankan hukuman bagi kesalahan merokok di kawasan larangan, KKM ingin

memaklumkan bahawa kesalahan merokok adalah merupakan kesalahan yang boleh dikompaun. Mengikut garis panduan KKM, bagi kesalahan pertama, RM250 dikenakan dan bayaran RM150 ditawarkan bagi penyelesaian dalam tempoh sebulan dan perkara ini masih diteruskan sehingga kini. Selain itu, pihak KKM juga mengambil langkah menyantuni golongan perokok dengan membantu mereka untuk berhenti merokok. Perkhidmatan berhenti merokok telah dipertingkatkan dan disesuaikan dengan situasi semasa terutama dalam situasi pandemik COVID-19 di mana laman sesawang [jomquit.moh.gov.my](http://jomquit.moh.gov.my) telah dikemaskini bagi menyampaikan maklumat tentang kepentingan berhenti merokok dan seterusnya mendapatkan khidmat berhenti merokok. Sepanjang tempoh ini 31 Julai 2020, seramai 59,924 orang melayari informasi melalui laman sesawang tersebut dengan 2,026 orang berdaftar untuk mendapatkan maklumat lanjut dan 842 orang bersetuju untuk menyertai rawatan berhenti merokok.

3. Setelah setahun penguatkuasaan pendidikan diberikan, bermula pada 1 Januari 2020 – 31 Julai 2020, penguatkuasaan penuh ditumpukan di tempat makan telah dijalankan di seluruh negara dan dalam tempoh tersebut, sebanyak 130,824 premis tempat makan telah diperiksa dengan 13,571 notis kesalahan telah dikeluarkan bernilai RM3.2 juta. Walau bagaimanapun, sepanjang tempoh Perintah Kawalan Pergerakan (PKP) yang dikuatkuasakan bermula 18 Mac 2020 akibat pandemik COVID-19, aktiviti penguatkuasaan tidak dilaksanakan berikutan semua tempat makan tidak beroperasi. Namun begitu, kerajaan telah mengumumkan Perintah Kawalan Pergerakan Bersyarat (PKPB) bermula 4 Mei 2020 dan seterusnya Perintah Kawalan Pergerakan Pemulihan (PKPP) yang mana tempat-tempat makan telah kembali beroperasi dan dalam tempoh ini, sebanyak 16,769 premis tempat makan telah diperiksa dengan 1,997 notis dikeluarkan bernilai RM 482,450.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN NURUL IZZAH BINTI ANWAR  
[ PERMATANG PAUH ]**

**TARIKH : 24 OGOS 2020 (ISNIN)**

**SOALAN**

Minta **PERDANA MENTERI** menyatakan langkah memperbaiki pengukuran kemiskinan multidimensi RMK-11 agar pangkalan data bagi taburan kemiskinan di Malaysia lebih jitu sebagaimana kajian yang dijalankan oleh Profesor Fatimah Kari daripada Universiti Malaya bahawa kadar kemiskinan sebenar tidak hanya dapat ditentukan melalui jumlah pendapatan semata-mata.

**JAWAPAN**

**YB DATO' SRI MUSTAPA BIN MOHAMED,  
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Sepertimana Ahli Yang Berhormat ambil maklum, bagi pengukuran kemiskinan yang lebih inklusif selaras dengan amalan antarabangsa, Indeks Kemiskinan Pelbagai Dimensi (MPI) telah diperkenal dalam Kajian Separuh Penggal Rancangan Malaysia Kesebelas (KSP RMKe-11). MPI mengukur dan memantau kemiskinan dalam perspektif pelbagai dimensi merangkumi kesihatan, pendidikan, taraf hidup (*living standard*) dan pendapatan.

2. Sumber data utama yang digunakan untuk mengukur kemiskinan ialah Survei Pendapatan dan Perbelanjaan Isi Rumah dan Kemudahan Asas (HIES & BA). HIES&BA adalah berdasarkan *Canberra Group Handbook on Household Income Statistics, Second Edition* (2011) yang diterbitkan oleh United Nations dan diterima pakai di peringkat antarabangsa. HIES & BA 2019 melibatkan persampelan lebih kurang 82 ribu isi rumah dari 7.3. juta isi rumah di Malaysia dan telah diterbitkan oleh DOSM pada 10 Julai 2020 yang lalu. MPI 2019 akan diterbitkan di dalam Rancangan Malaysia Kedua Belas (RMKe-12) yang dijadualkan pada Januari 2021.

3. Sehubungan ini, Kerajaan akan meneruskan libat urus dengan pemegang taruh berkaitan pelaksanaan MPI dalam perancangan dan penggubalan dasar, strategi serta inisiatif ke arah pembasmian kemiskinan yang lebih komprehensif dan berkesan bermula pada RMKe-12 sejajar dengan Wawasan Kemakmuran Bersama 2030.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**  
**DARIPADA : YB TUAN SIM TZE TZIN [BAYAN BARU]**  
**TARIKH : 24 OGOS 2020 (ISNIN)**

**SOALAN**

**YB TUAN SIM TZE TZIN (BAYAN BARU)** minta **PERDANA MENTERI** menyatakan adakah Pelan Antirasuah Nasional 2019-2023 akan diteruskan oleh Kerajaan. Setakat kini, sejauh manakah 6 strategi, 17 objektif strategik dan 115 inisiatif telah tercapai.

**JAWAPAN [YB DATO' TAKIYUDDIN BIN HASSAN,  
MENTERI DI JABATAN PERDANA MENTERI  
(PARLIMEN DAN UNDANG-UNDANG)]**

Tuan Yang di-Pertua,

Kerajaan meneruskan keputusan dasar yang dicapai sebelum ini dalam usaha membanteras rasuah di Malaysia. Kerajaan juga meneruskan usaha meningkatkan tadbir urus dan integriti melalui pelaksanaan Pelan Antirasuah Nasional (NACP) 2019-2023, bagi memastikan hasrat meningkatkan ekonomi dan kesejahteraan rakyat dapat dilaksanakan secara telus dan berkesan. Ini adalah selaras dengan titah Duli Yang Maha Mulia Seri Paduka Baginda Yang Di-Pertuan Agong sempena pembukaan Penggal Ketiga, Parlimen Ke-14 pada 18 Mei 2020 yang menyarankan agar Kerajaan untuk terus komited dalam melaksanakan Pelan Antirasuah Nasional.

Sehingga 31 Mei 2020, sebanyak 28 inisiatif telah selesai dilaksanakan. Merujuk kepada enam (6) strategi dalam NACP berkenaan, berikut adalah pencapaian yang diperoleh setakat 31 Mei 2020:

i)	Tadbir Urus Politik	: 12 Inisiatif
ii)	Pentadbiran Sektor Awam	: 3 Inisiatif
iii)	Perolehan Awam	: 4 Inisiatif
iv)	Perundangan/Kehakiman	: 1 Inisiatif
v)	Penguatkuasaan Undang-Undang	: 6 Inisiatif
vi)	Tadbir Urus Korporat	: 2 Inisiatif

Ringkasan mengikut tahun pelaksanaan yang telah ditetapkan adalah seperti berikut:

- Jangka Pendek : 1 Tahun – (Jan 2019 - Dis 2019)  
15 Inisiatif  
Selesai: 15 Inisiatif (100%)
- Jangka Sederhana : 2 Tahun – (Jan 2019 - Dis 2020)  
46 Inisiatif  
Selesai : 7 Inisiatif (15%)
- Jangka Panjang : 5 Tahun – (Jan 2019 - Dis 2023)  
54 Inisiatif  
Selesai : 6 Inisiatif (11%)

Definisi ke atas 28 inisiatif yang telah selesai tersebut adalah bermaksud inisiatif yang telah menghasilkan pencapaian diperingkat pengeluaran output. Dalam konteks pelaksanaan sesuatu inisiatif, elemen penilaian merupakan ketetapan asas dalam proses pemantauan kemajuan inisiatif ke arah output yang dihasilkan dan sama ada perubahan yang dibuat tersebut dapat menjamin bahawa inisiatif yang dilaksanakan tersebut berada di landasan yang betul dan disesuaikan dengan dasar semasa Kerajaan.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' MASIR KUJAT [SRI AMAN]**

**TARIKH : 24 OGOS 2020 (ISNIN)**

**SOALAN**

**DATO' MASIR KUJAT [ SRI AMAN ]** minta **MENTERI KESIHATAN** menyatakan apakah status pelaksanaan Hospital Sri Aman pada masa ini. Bilakah ianya dijangka siap dibina.

**JAWAPAN**

**Tuan Yang di-Pertua,**

1. Kementerian Kesihatan Malaysia (KKM) sentiasa berusaha menambahbaik capaian sistem perkhidmatan kesihatan demi kesejahteraan rakyat Malaysia terutamanya penduduk Sarawak.
2. Untuk makluman, Hospital Sri Aman kini sedang dalam Fasa 2 pelaksanaan di mana kerja-kerja bangunan dan kerja-kerja berkaitan sedang giat dijalankan. Sehingga Julai 2020, status sebenar kemajuan kerja di tapak ialah sebanyak 82.57% berbanding 91.00% jadual. Tarikh siap semasa projek ini adalah pada 6 Februari 2021.
3. Antara perkara yang menyebabkan kelewatan projek ini disiapkan ialah Perintah Kawalan Pergerakan (PKP), isu mendapatkan tanah dan pindaan rekabentuk.
4. Kementerian ini bersama Jabatan Kerja Raya dan Agensi-agensi Kerajaan yang lain sentiasa bekerjasama dengan erat bagi memastikan projek ini berjalan dengan lancar. Adalah menjadi aspirasi Kementerian ini agar projek-projek ini disiapkan pada masa, kos dan standard yang telah ditetapkan.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN FONG KUI LUN [ BUKIT BINTANG ]**

**TARIKH : 24 OGOS 2020 ( ISNIN )**

**SOALAN**

**TUAN FONG KUI LUN [ BUKIT BINTANG ]** minta **MENTERI WILAYAH PERSEKUTUAN** menyatakan apakah yang Kementerian dan Dewan Bandaraya Kuala Lumpur sedang berusaha membersihkan imej Bandaraya Kuala Lumpur dari gelandangan, penagih dadah, pengemis/kutu rayau, pendatang asing yang menjual bunga dan tisu di kawasan Bukit Bintang yang dilihat sebagai menjejaskan imej bersih dan ceria ibu kota.

**JAWAPAN**

Tuan Yang Di Pertua,

Untuk makluman Yang Berhormat Bukit Bintang, Dewan Bandaraya Kuala Lumpur (DBKL) sedia maklum dengan isu orang gelandangan, penagih dadah, pengemis atau kutu rayau dan warga asing yang menjalankan aktiviti penjajaan tanpa lesen dari DBKL. Bagi menangani isu dan permasalahan tersebut ianya memerlukan tanggungjawab bersama Agensi-agensi Kerajaan di bawah Kementerian Dalam Negeri (KDN), Kementerian Pembangunan Wanita, Keluarga dan Masyarakat (KPWKM) dan Dewan Bandaraya Kuala Lumpur (DBKL).

Untuk makluman Tuan Yang Di Pertua dan Ahli-Ahli Yang Berhormat jua, usaha-usaha bagi menyelamatkan orang gelandangan, pengemis atau kutu rayau adalah di bawah bidang tugas dan tanggungjawab Jabatan Kebajikan Masyarakat (JKM) agensi di bawah Kementerian Pembangunan Wanita, Keluarga dan Masyarakat (KPWKM) dengan merujuk kepada Akta Orang Papa 1977. Manakala usaha-usaha bagi menangani isu warga asing dan penagih dadah pula adalah di bawah bidang tugas dan tanggungjawab Jabatan Imigresen Malaysia (JIM) serta Agensi Anti Dadah Kebangsaan (AADK) agensi di bawah Kementerian Dalam Negeri (KDN).

Walau bagaimanapun, DBKL senantiasanya membantu Agensi-agensi Kerajaan berkenaan dalam melaksanakan tindakan operasi bersepadu dengan menyelaraskan kekuatan petugas serta bantuan logistik.

Mengenai aktiviti penjajaan warga asing, DBKL akan mengambil tindakan ke atas penjaja warga asing yang didapati menjalankan aktiviti perniagaan tanpa lesen dengan membuat pengusiran atau mengambil tindakan penguatkuasaan dengan menyita barangan perniagaan bagi tujuan jualan di tempat awam. Tindakan sitaan serta merta terhadap pelbagai barangan perniagaan akan dilaksanakan dan semua barangan yang disita tidak boleh dituntut.

Tindakan penguatkuasaan diambil berdasarkan tindakan di bawah Seksyen 46(1)(d) Akta Jalan, Parit dan Bangunan 1974 iaitu letak atau menyebabkan diletak barang, benda berhubung trednya di tempat awam dan UUK 3(1) Undang-Undang Kecil Pelesenan Penjaja (Wilayah Persekutuan Kuala Lumpur) 2016 iaitu bertindak sebagai penjaja tanpa lesen dari DBKL.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN AHMAD BIN HASSAN [ PAPAR ]**

**TARIKH : 24 OGOS 2020 (ISNIN)**

**SOALAN**

**YB TUAN AHMAD BIN HASSAN [ PAPAR ]** minta **PERDANA MENTERI** menyatakan sewaktu Sabah, Sarawak berserta Singapura dalam Malaysia, peruntukan 35% dari jumlah kesemua kerusi Parlimen diberi akan tetapi setelah Singapura keluar dari Malaysia keadaan ini berubah di mana kerusi untuk Singapura disalurkan ke Semenanjung Malaysia menyebabkan kerusi Sabah dan Sarawak tinggal 28% dan Semenanjung Malaysia naik 7% menjadi 72%, apakah langkah-langkah yang harus diambil oleh Kerajaan untuk menjadikan nisbah 35: 65 kembali dari jumlah kerusi 222 keseluruhannya.

**JAWAPAN : [YB DATO' TAKIYUDDIN BIN HASSAN, MENTERI DI  
JABATAN PERDANA MENTERI (PARLIMEN DAN  
UNDANG-UNDANG)]**

Tuan Yang di Pertua,

Penetapan komposisi bilangan kerusi dalam Parlimen adalah tertakluk di bawah Perlembagaan Persekutuan. Sebarang tambahan atau pengurangan bilangan kerusi akan melibatkan pindaan kepada Perkara 45, Perlembagaan Persekutuan bagi komposisi Dewan Negara dan Perkara 46, Perlembagaan Persekutuan bagi komposisi Dewan Rakyat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN KHALID BIN ABD SAMAD  
[ SHAH ALAM ]**

**TARIKH : 24 OGOS 2020 (ISNIN)**

**SOALAN**

**TUAN KHALID BIN ABD SAMAD [ SHAH ALAM ]** minta **MENTERI WILAYAH PERSEKUTUAN** menyatakan berkaitan peruntukan sebanyak RM150 juta yang diumumkan untuk menyewa ruang niaga di Kompleks Perniagaan Berjaya Times Square oleh Dewan Bandaraya Kuala Lumpur.

**JAWAPAN**

Tuan Yang Di Pertua,

Untuk makluman Yang Berhormat Shah Alam, tiada peruntukan sebanyak RM150 juta bagi tujuan penyewaan ruang niaga di Kompleks Perniagaan Berjaya Times Square dimaksudkan oleh Dewan Bandaraya Kuala Lumpur.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK DR. HASAN BIN BAHROM [ TAMPIN ]**

**TARIKH : 24 OGOS 2020 (ISNIN)**

**SOALAN**

**DATUK DR. HASAN BIN BAHROM [ TAMPIN ]** minta **MENTERI KESIHATAN** menyatakan berapa jumlah peruntukan yang telah **disalurkan dan jumlah yang telah dibelanjakan** dalam menangani wabak tersebut, bagaimana Kementerian memastikan setiap perbelanjaan tidak berlaku ketirisan dan apakah jaminan Kementerian dalam memastikan wabak tersebut dapat dikawal sepenuhnya.

**JAWAPAN**

**Tuan Yang di-Pertua,**

1. YB Tampin tentu sekali merujuk soalan ini berkaitan dengan COVID-19. Oleh itu, Kementerian Kesihatan Malaysia (KKM) telah disediakan peruntukan sebanyak RM1bilion bagi menangani wabak COVID-19 dan sehingga 7 Ogos 2020, KKM telah membelanjakan sebanyak RM720 juta bagi pembelian peralatan, bekalan perubatan, barangan guna pakai (*consumables*)/ PPE, *test kit* dan lain-lain perkhidmatan dalam usaha mengawal wabak COVID-19.

2. Dalam menguruskan perbelanjaan peruntukan COVID-19 ini, KKM telah melaksanakan perolehan darurat selaras dengan Pekeliling Perbendaharaan PB 3.3 – Garis Panduan Perbelanjaan Darurat AP55 dan Perolehan Darurat AP173.2 secara teratur dan mematuhi semua peraturan Kementerian Kewangan yang berkuat kuasa. Penilaian teknikal juga telah dilaksanakan bagi semua item yang ditawarkan oleh pembekal bagi memastikan item yang dibekalkan memenuhi spesifikasi yang telah ditetapkan. Selain itu, rundingan harga juga telah dilaksanakan dengan

semua pembekal bagi mendapatkan harga yang munasabah. Kerajaan akan sentiasa memastikan peruntukan yang mencukupi dalam memastikan wabak COVID-19 dapat diuruskan dengan baik dan terkawal.

3. Menyedari hakikat ini, Kementerian Kesihatan Malaysia (KKM) telah melaksanakan langkah-langkah berikut bagi mengekang penularan jangkitan COVID-19 dalam kalangan masyarakat setempat:

- i. Memperkukuhkan dan meningkatkan kesiapsiagaan dalam menangani wabak ini antaranya dengan meningkatkan kapasiti fasiliti kesihatan dan peralatan perubatan untuk merawat pesakit, memastikan bekalan ubat sentiasa mencukupi, kesediaan makmal pada suatu tahap yang optimum bagi melaksanakan ujian pengesanan COVID-19 serta penubuhan pusat kuarantin dan rawatan berisiko rendah;
- ii. Bagi menangani kejadian pandemik COVID-19 ini secara berkesan, anggota KKM dari setiap peringkat perlu terlibat secara aktif sebagai suatu pasukan besar. Dalam menghadapi krisis dengan skala sebegini, semua pihak perlu saling melengkapi sebagai satu pasukan bagi memutuskan rantai jangkitan COVID-19 ini. Begitu juga dengan penglibatan pelbagai jentera kerajaan yang diterajui oleh Majlis Keselamatan Negara (MKN) selaku Sekretariat Kebangsaan COVID-19, bagi memastikan segala aktiviti kawalan dan pencegahan dapat dijalankan secara berkesan hingga ke peringkat akar umbi. Tidak dilupakan, ia turut melibatkan kerjasama yang diberikan oleh setiap peringkat dan lapisan masyarakat dalam memainkan peranan masing-masing – yang meliputi amalan kelaziman baharu dalam kehidupan seharian serta pematuhan kepada Prosedur Operasi Standard (SOP) seperti yang telah ditetapkan oleh kerajaan. Ianya dikenali sebagai *whole-of-government and whole-of-society approaches*;
- iii. Pengurusan kejadian kluster jangkitan COVID-19 secara berkesan dan menyeluruh melalui pengesanan kes secara aktif (*active case detection*) dalam kalangan kontak rapat yang dijejaki. Kluster yang berjaya dibendung dengan pantas melalui

## SOALAN NO : 23

pendekatan tersebut akan dapat mengelakkan penularan jangkitan dari berlaku secara meluas dalam kalangan masyarakat setempat. Pengesanan kes secara aktif ini turut melibatkan aktiviti saringan bertumpu yang terdiri dari sembilan (9) kumpulan sasar sebagaimana berikut:

- a) Para peserta tabligh yang menyertai perhimpunan di Masjid Seri Petaling, Kuala Lumpur;
- b) Para pelajar tahfiz / madrasah di seluruh negara disebabkan rantai epidemiologi yang dikesan dalam kalangan mereka dengan peserta tabligh yang menyertai perhimpunan di Masjid Seri Petaling, Kuala Lumpur;
- c) Petugas perubatan dan kesihatan KKM;
- d) Penduduk di lokaliti yang diletakkan di bawah semua jenis Perintah Kawalan Pergerakan Diperketatkan (PKPD);
- e) Pengembara yang tiba dari luar negara;
- f) Peniaga pasar yang dikenalpasti mempunyai kaitan dengan kluster positif yang dikesan di Pasar Borong Kuala Lumpur;
- g) Pekerja bukan warganegara bagi sektor pembinaan dan keselamatan di sekitar Lembah Klang;
- h) Penghuni dan pekerja di Pusat Jagaan Warga Emas; dan
- i) Tahanan dan anggota yang bertugas di Depoh Tahanan Imigresen.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN KHALID BIN ABD SAMAD  
[ SHAH ALAM ]**

**TARIKH : 24 OGOS 2020 (ISNIN)**

**SOALAN**

**TUAN KHALID BIN ABD SAMAD [ SHAH ALAM ]** minta **MENTERI WILAYAH PERSEKUTUAN** menyatakan berkaitan peruntukan sebanyak RM150 juta yang diumumkan untuk menyewa ruang niaga di Kompleks Perniagaan Berjaya Times Square oleh Dewan Bandaraya Kuala Lumpur.

**JAWAPAN**

Tuan Yang Di Pertua,

Untuk makluman Yang Berhormat Shah Alam, tiada peruntukan sebanyak RM150 juta bagi tujuan penyewaan ruang niaga di Kompleks Perniagaan Berjaya Times Square dimaksudkan oleh Dewan Bandaraya Kuala Lumpur.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : TUAN PANG HOK LIONG [ LABIS ]**

**TARIKH : 24 OGOS 2020**

**SOALAN**

**TUAN PANG HOK LIONG [ LABIS ]** minta **PERDANA MENTERI** menyatakan jumlah negara yang telah mengiktiraf Kerajaan Perikatan Nasional dan senaraikan nama negara-negara berkenaan.

**JAWAPAN**

Tuan Yang di-Pertua,

Saya mengucapkan terima kasih kepada Yang Berhormat Labis atas pertanyaan yang dikemukakan.

2. Isu pengiktirafan Kerajaan Perikatan Nasional sepatutnya tidak menjadi satu persoalan baik di dalam atau di luar dewan ini.

3. Walau bagaimana pun, bagi menjawab soalan Yang Berhormat Labis, dengan ringkas, jelas dan mudah, saya ini memaklumkan bahawa tidak ada satu negara pun yang menyatakan bahawa mereka tidak mengiktiraf Kerajaan yang ada pada masa ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN HAJAH FUZIAH BINTI SALLEH  
[KUANTAN]**

**TARIKH : 24 OGOS 2020 (ISNIN)**

**SOALAN**

**PUAN HAJAH FUZIAH BINTI SALLEH [ KUANTAN ]** minta **MENTERI PERDAGANGAN ANTARABANGSA DAN INDUSTRI** menyatakan adakah industri halal sedia ada di negara ini terjejas ekoran wabak COVID-19 dan apakah rangsangan dan bantuan yang diberi kepada mereka dalam situasi sekarang mengikut negeri dan sektor.

**JAWAPAN**

Tuan Yang di-Pertua,

1. Ekosistem Halal Malaysia merentasi pelbagai bidang industri dan sektor serta merupakan sebahagian daripada rantai aktiviti ekonomi yang turut disertai oleh pengusaha perusahaan kecil dan sederhana (PKS). Oleh itu, penularan pandemik wabak COVID-19 telah memberikan kesan terhadap industri halal.
2. Antara sektor yang terkesan adalah perkhidmatan penyediaan makanan dan minuman yang terpaksa beralih aktiviti perniagaan kepada sistem penghantaran rumah ke rumah menggunakan kaedah sistem atas talian (*online*). Selain itu, ia turut menjejaskan rantai bekalan perusahaan pemprosesan barangan halal ekoran pengeluaran bahan mentah yang terhad bagi menampung keperluan pasaran sedia ada.
3. Selaras dengan pengenalan norma baharu dalam menghadapi pandemik ini, para pengusaha industri halal terutamanya syarikat-syarikat PKS digalakkan untuk menggunakan kaedah sistem atas talian dalam melakukan aktiviti perniagaan mereka yang merangkumi transaksi kewangan, khidmat nasihat dan perkongsian maklumat pasaran.
4. Bagi tujuan ini, pihak Kerajaan telah menyediakan bantuan Inisiatif PENJANA untuk memperkasakan platform digital melalui kempen e-dagang kepada perusahaan mikro dan PKS yang antaranya termasuk program '*e-coaching*' dan '*online learning*' di bawah Halal Development Corporation Berhad (HDC). Berdasarkan rekod terkini, program ini telah berjaya melibatkan seramai 1,100 penyertaan semasa tempoh PKP. Ia juga membantu para perusahaan yang layak dengan menyediakan kemudahan seperti latihan *onboarding*, khidmat sokongan jualan dan subsidi bagi kos yang berkaitan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN FONG KUI LUN [ BUKIT BINTANG ]**

**TARIKH : 24 OGOS 2020 (ISNIN)**

**SOALAN**

**TUAN FONG KUI LUN [ BUKIT BINTANG ]** minta **PERDANA MENTERI** menyatakan impak penularan pandemik COVID-19 ke atas ekonomi dan sosial Malaysia keseluruhannya dan bagaimana Kerajaan melaksanakan program pemulihan ekonomi negara yang terjejas supaya keadaan berbalik semula sebagaimana landasan yang asal.

**JAWAPAN**

**Tuan Yang di-Pertua,**

1. Untuk makluman Ahli Yang Berhormat, pandemik COVID-19 telah memberi kesan yang amat ketara kepada ekonomi negara. Pertumbuhan keluaran dalam negeri kasar (KDNK) bagi separuh pertama tahun 2020 mencatatkan penguncupan sebanyak 8.3% [S1' 20: 0.7%; S2' 20: - 17.1%]. Penguncupan ini adalah disebabkan oleh langkah yang diambil bagi membendung penyebaran pandemik COVID-19, termasuk pelaksanaan Perintah Kawalan Pergerakan sejak 18 Mac 2020. Semua sektor utama ekonomi seperti perkhidmatan, pembuatan dan pembinaan telah terjejas akibat penularan wabak ini.
2. Pertumbuhan ekonomi dijangka bertambah baik pada separuh kedua tahun ini ditunjukkan oleh beberapa indikator ekonomi yang semakin pulih seperti perdagangan borong dan runcit, jualan kenderaan

penumpang dan kadar purata penginapan hotel. Pertumbuhan ekonomi bagi tahun ini dianggarkan bertumbuh di antara -5.5% hingga -3.5%. Pemulihan sepenuhnya ekonomi negara dijangka akan dicapai pada tahun 2021 dengan jangkaan pertumbuhan di antara 5.5% hingga 8%. Jangkaan ini adalah seiring dengan Tabung Kewangan Antarabangsa dan Bank Dunia yang mengunjurkan KDNK Malaysia bertumbuh sebanyak 6.3% dan 6.9% pada tahun hadapan.

3. Kesan pandemik COVID-19 yang terpaksa ditanggung oleh rakyat adalah cukup berat. Di samping terdapat pekerja di syarikat swasta yang terpaksa diberhentikan, pekerja di sektor informal seperti peniaga pasar malam dan penjaja juga tidak dapat keluar untuk mencari rezeki semasa tempoh Perintah Kawalan Pergerakan (PKP) yang lalu. Malahan, ada juga Perusahaan Kecil dan Sederhana (PKS) termasuk peniaga kecil-kecilan yang terpaksa menutup terus perniagaan mereka kerana tidak dapat menanggung kerugian yang berterusan. Ini sekaligus menyebabkan pendapatan rakyat berkurangan, terutamanya golongan B40 yang memerlukan bantuan Kerajaan untuk meneruskan kehidupan. Justeru, Kerajaan dengan sedaya upaya akan terus membela nasib rakyat seperti keluarga Makcik Kiah bagi memastikan tiada golongan yang tercicir dalam menikmati manfaat daripada pakej rangsangan ekonomi peduli rakyat ini.

4. Selain daripada itu, pandemik COVID-19 telah mengubah kehidupan dan gaya hidup rakyat Malaysia kepada norma baharu dalam amalan kerja dan interaksi sosial. Amalan bekerja dari rumah kini sudah menjadi kebiasaan dalam memastikan kelangsungan operasi perniagaan dan perkhidmatan Kerajaan. Selain itu, pelaksanaan waktu bekerja anjal, penggiliran kerja di pejabat, pertukaran syif kerja, tugas kerja berasaskan projek dan sebagainya telah mula diperkenalkan. Pandemik ini juga telah mempercepatkan lagi penggunaan platform digital dalam bidang perniagaan dan perdagangan, pendidikan serta komunikasi.

**Tuan Yang di-Pertua,**

5. Dalam usaha untuk memulihkan ekonomi negara yang terjejas kesan daripada pandemik COVID-19 ini, Kerajaan telah membuat

perancangan berdasarkan enam pendekatan utama iaitu Ketegasan (*Resolve*), Ketahanan (*Resilience*), Memulakan Semula (*Restart*), Pemulihan (*Recovery*), Memperkasa (*Revitalise*) dan Menyusun Semula (*Reform*). Enam pendekatan utama ini adalah bagi memastikan ekonomi dapat kembali berada pada landasan pertumbuhan yang mampan. Pelaksanaan PKP yang bermula pada 18 Mac 2020 merupakan pendekatan pertama iaitu Ketegasan (*Resolve*), yang telah menyumbang kepada kejayaan Kerajaan membendung penularan pandemik COVID-19 dalam negara.

6. Untuk makluman Ahli Yang Berhormat, di bawah pendekatan kedua iaitu Ketahanan (*Resilience*), Kerajaan telah memperkenalkan Pakej Rangsangan Ekonomi Prihatin Rakyat (PRIHATIN) yang berjumlah RM260 bilion pada Mac 2020 bagi menjaga kesejahteraan rakyat, menyokong kelestarian perniagaan, khususnya perusahaan kecil dan sederhana (PKS), dan memastikan kelangsungan kegiatan ekonomi utama. PRIHATIN yang bernilai 19% kepada KDNK adalah antara pakej rangsangan yang terbesar di kalangan negara membangun.

7. Di bawah pendekatan ketiga iaitu Memulakan Semula (*Restart*), Kerajaan telah memulakan semula ekonomi secara meluas dalam keadaan yang terkawal dan teratur. Sebahagian besar sektor ekonomi dibuka semula, namun sektor serta aktiviti yang melibatkan perhimpunan rakyat secara beramai-ramai tidak dibenarkan.

**Tuan Yang di-Pertua,**

8. Di bawah pendekatan yang seterusnya iaitu Pemulihan (*Recovery*), Kerajaan telah memperkenalkan Pelan Jana Semula Ekonomi Negara (PENJANA) bernilai RM35 bilion pada Jun 2020. PENJANA memberi fokus kepada tiga teras utama, iaitu untuk memperkasakan rakyat, melonjakkan perniagaan dan merangsang ekonomi. Ianya merangkumi langkah-langkah untuk melindungi pekerjaan, mempromosikan pekerjaan serta membolehkan perniagaan mengekalkan operasi dan meningkatkan produktiviti secara beransur-ansur.

9. Untuk makluman Ahli Yang Berhormat juga, di bawah pendekatan kelima dan keenam, Memperkasa (Revitalize) dan Menyusun Semula (Reform), Kerajaan melalui Majlis Tindakan Ekonomi (EAC) sedang dalam proses penyediaan pelan pemulihan ekonomi jangka sederhana hingga panjang. Pelan ini akan dibentangkan pada bulan Oktober 2020 memberi tumpuan kepada penambahbaikan dalam pasaran buruh, penambahbaikan peraturan dan pengukuhan persaingan dalam pasaran, isu pelaburan berkualiti, reformasi institusi awam dan kerangka urus tadbir serta pelaksanaan pendigitalan dan Revolusi Perindustrian Keempat. Selain daripada itu, peranan sektor awam dan swasta juga akan diteliti semula dalam menyokong pertumbuhan dan kelestarian ekonomi Malaysia dalam jangka masa panjang.

10. Rancangan Malaysia Kedua Belas (RMKe-12) yang pada awalnya dijadualkan 6 Ogos 2020 di Dewan Rakyat telah ditangguhkan kepada tahun hadapan bagi membolehkan Kerajaan mengambil kira keadaan ekonomi semasa negara yang terkesan teruk akibat pandemik COVID-19 dalam merangka dasar dan strategi pembangunan jangka sederhana. Bagi tujuan tersebut, Kerajaan juga sedang giat mengadakan semula libat urus bersama semua pihak berkepentingan, termasuk kementerian dan agensi Kerajaan Persekutuan, kerajaan negeri, pihak swasta, badan antarabangsa dan akademik.

11. Kerajaan percaya bahawa dengan pendekatan dan langkah yang telah diambil untuk menangani kesan daripada pandemik COVID-19, ekonomi negara akan kembali kukuh bagi memastikan kebajikan dan kesejahteraan rakyat terus terpelihara.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN TEH KOK LIM [ TAIPING ]**

**TARIKH : 24 OGOS 2020 (ISNIN)**

**SOALAN**

**TUAN TEH KOK LIM [TAIPING]** minta **MENTERI KESIHATAN** menyatakan tahap pencapaian skim PEKA B40 setakat ini dan rancangan seterusnya dalam usaha menambah baik lagi skim tersebut.

**JAWAPAN**

**Tuan Yang di-Pertua,**

1. Skim PeKa B40 mula dilaksanakan di seluruh negara sebagai projek perintis untuk kumpulan B40 yang merupakan penerima Bantuan Sara Hidup (BSH) dan pasangannya yang berdaftar, berumur 50 tahun dan ke atas pada 15 April 2019. Bermula 1 Januari 2020, skim ini telah diperluaskan kepada penerima BSH dan pasangannya, berumur 40 tahun dan ke atas.
2. Skim PeKa B40 menawarkan 4 manfaat iaitu manfaat pertama adalah saringan kesihatan untuk mencegah penyakit tidak berjangkit sebagai fokus utama. Tiga manfaat lain yang ditawarkan adalah Bantuan Alat Perubatan (Manfaat 2), Insentif Melengkapkan Rawatan Kanser (Manfaat 3) dan Insentif Tambang Pengangkutan (Manfaat 4).
3. Sehingga 31 Mei 2020, terdapat 2,640 Klinik PeKa B40 yang terdiri daripada 1,753 klinik perubatan swasta umum dan 887 Klinik Kesihatan Kerajaan. Ianya juga melibatkan 6 syarikat makmal swasta dengan 182 cawangan kesemuanya di seluruh negara.



4. Skim PeKa B40 ini telah membawa banyak kebaikan dalam membantu menampung keperluan kesihatan untuk kumpulan B40. Setelah lebih setahun pelaksanaannya iaitu sehingga 31 Mei 2020, seramai 351,814 penerima telah melakukan saringan kesihatan iaitu Manfaat 1, manakala sebanyak 10,948 permohonan diluluskan bagi Manfaat 2, 2,270 permohonan diluluskan bagi Manfaat 3 dan 7,144 permohonan diluluskan bagi Manfaat 4.

5. Sebanyak 42.5% penerima dikesan mempunyai sekurang-kurangnya satu penyakit tidak berjangkit iaitu sama ada kencing manis, darah tinggi, kolesterol tinggi atau masalah kesihatan mental, yakni sama ada kebimbangan atau kemurungan.

6. Setelah lebih setahun implementasi, Kementerian Kesihatan Malaysia (KKM) sedang berusaha menambahbaik skim PeKa B40 ini termasuk langkah meningkatkan mutu dan kualiti perkhidmatan misalnya dengan menjalankan audit perubatan bagi kes-kes yang telah disaring. KKM juga meneliti efisiensi pembelian perkhidmatan dan peralatan kesihatan dengan melakukan rundingan harga serta pembelian yang lebih kos efektif. Selain itu, KKM ingin meningkatkan skim PeKa B40 dengan pelbagai manfaat yang lain seperti penurunan kelayakan had umur dan rawatan penyakit tidak berjangkit di klinik swasta PeKa B40. Walau bagaimanapun, ini tertakluk kepada keadaan kewangan dan ekonomi semasa negara.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN HASSAN BIN ABDUL KARIM  
[PASIR GUDANG ]**

**TARIKH : 24 OGOS 2020 (ISNIN)**

**SOALAN**

**TUAN HASSAN BIN ABDUL KARIM [ PASIR GUDANG ]** minta **MENTERI KESIHATAN** menyatakan bilakah tarikh yang pasti pembinaan Hospital Pasir Gudang akan dimulakan.

**JAWAPAN**

**Tuan Yang di-Pertua,**

1. Projek Pembinaan Hospital Pasir Gudang (304 katil) kini di peringkat perolehan oleh Agensi Pelaksana projek iaitu Jabatan Kerja Raya Malaysia (JKR).
2. Untuk makluman ahli Dewan Yang Mulia, projek ini telah pun ditender pada 8 Ogos 2019 yang lepas dan tarikh tutup tender adalah pada 7 November 2019.
3. Penilaian teknikal dan kewangan telah dibuat dan satu laporan penilaian tender telah diangkat ke Lembaga Perolehan JKR yang telah bersidang pada 14 Februari 2020. Perakuan dan kelulusan syor kontraktor telah diperolehi daripada Kementerian Kewangan (MOF). Oleh itu, Surat Niat (LOI) telah dikeluarkan pada 6 Julai 2020 dan Surat Setuju Terima (SST) dijangka dikeluarkan pada 30 Ogos 2020. Jangkaan Tarikh Milik Tapak projek adalah pada 14 September 2020. Tempoh pembinaan projek adalah selama 48 bulan dengan Tarikh Jangka Siap pada 14 September 2024. Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN AKMAL NASRULLAH BIN  
MOHD. NASIR [ JOHOR BAHRU]**

**TARIKH : 24 OGOS 2020 (ISNIN)**

**SOALAN**

**YB TUAN AKMAL NASRULLAH BIN MOHD. NASIR [JOHOR BAHRU]** minta **PERDANA MENTERI** menyatakan kesediaan Kerajaan untuk mewajibkan setiap Ahli-ahli Parlimen untuk membuat pengisytiharan harta secara terbuka termasuk butiran mengenai pendapatan, perbelanjaan dan aset-aset.

**JAWAPAN: [YB DATO' TAKIYUDDIN BIN HASSAN, MENTERI DI  
JABATAN PERDANA MENTERI (PARLIMEN DAN  
UNDANG-UNDANG)]**

Tuan Yang di-Pertua,

Sebagaimana Ahli Yang Berhormat sedia maklum, pada 1 Julai 2019 (Isnin), Majlis Mesyuarat Dewan Rakyat telah meluluskan usul supaya Ahli-ahli Dewan Rakyat hendaklah mengisytiharkan harta mereka termasuk isteri atau suami, anak dan pemegang amanah sebelum 1 Oktober 2019 (Selasa). Selanjutnya, pada 26 November 2019 (Selasa), Majlis Mesyuarat Dewan Rakyat telah meluluskan usul melanjutkan tarikh pengisytiharan harta tidak lewat daripada hari Khamis, 5 Disember 2019.

Usul tersebut menyatakan Ahli-ahli Dewan Rakyat hendaklah membuat Akuan Berkanun dan mengemukakanannya kepada Tuan Yang di-Pertua Dewan Rakyat dan disalinkan kepada Ketua Pesuruhjaya Suruhanjaya Pencegahan Rasuah Malaysia. Senarai nama Ahli Dewan Rakyat yang telah mengisytiharkan harta akan dipaparkan dalam portal Suruhanjaya Pencegahan Rasuah Malaysia (SPRM) bersama butiran pengisytiharan harta Ahli Dewan Rakyat tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : DATO' SERI ANWAR BIN IBRAHIM  
[ PORT DICKSON ]**

**TARIKH : 24 OGOS 2020**

**SOALAN**

**DATO' SERI ANWAR BIN IBRAHIM [ PORT DICKSON ]** minta **MENTERI LUAR NEGERI** menyatakan apakah langkah-langkah Kerajaan bagi meningkatkan tekanan antarabangsa bagi menentang pelan pengilhakan (*annexation*) sebahagian wilayah Tebing Barat.

**JAWAPAN**

Tuan Yang di-Pertua,

Saya mengucapkan terima kasih kepada Yang Berhormat Port Dickson atas pertanyaan yang dikemukakan.

**Tuan Yang di-Pertua,**

2. Kerajaan Malaysia sentiasa konsisten dengan dasar luarnya terhadap isu penindasan Israel ke atas rakyat Palestin secara berterusan. Malaysia sejak dahulu lagi mengutuk sekeras-kerasnya pembinaan penempatan haram oleh Israel. Tindakan Parlimen Israel meluluskan pembinaan penempatan haram sememangnya menyalahi undang-undang antarabangsa, khususnya Resolusi 2334, Majlis Keselamatan Pertubuhan Bangsa-bangsa Bersatu (PBB) yang diluluskan pada 23 Disember 2016.

3. Dalam konteks ini, Malaysia melihat rancangan Israel untuk mengilhak (*annex*) sebahagian wilayah Tebing Barat adalah sebagai lanjutan kepada pencabulan berterusan Israel ke atas hak-hak rakyat Palestin dan penghinaan terhadap undang-undang antarabangsa. Aktiviti penempatan haram Israel ini juga mampu mengancam penyelesaian dua negara konflik ini.

4. Lanjutan daripada isu ini, antara perkara yang telah dilaksanakan oleh Malaysia adalah seperti berikut:

- i. Kementerian Luar Negeri telah mengeluarkan kenyataan pada 22 Mei 2020 bagi mengutuk sekeras-kerasnya rancangan Israel untuk mengilhak sebahagian wilayah Tebing Barat;
- ii. Seri Paduka Baginda Yang di-Pertuan Agong membangkitkan isu ini semasa perbualan telefon dengan Presiden Recep Tayyip Erdogan, Presiden Republik Turki pada 1 Jun 2020;
- iii. Yang Berhormat Timbalan Menteri Luar Negeri telah mengetuai delegasi Malaysia ke Mesyuarat Tergempar Pertubuhan Kerjasama Islam (OIC) *Open-Ended Virtual Extraordinary Meeting* Peringkat Menteri-Menteri Luar Negeri yang diadakan secara atas talian (*virtual*) pada 10 Jun 2020 bagi membincangkan rancangan Israel untuk mengilhak sebahagian wilayah Tebing Barat;
- iv. Seri Paduka Baginda Yang di-Pertuan Agong melalui satu kenyataan media bertarikh 14 Jun 2020 menzahirkan rasa sangat prihatin dan sokongan Baginda kepada rakyat Palestin yang terus dijajah dan ditindas oleh rejim Israel. Seri Paduka Baginda juga menyeru seluruh rakyat Malaysia untuk mendoakan agar rakyat Palestin dilindungi serta menitahkan agar masjid-masjid dan surau-surau untuk mengadakan solat sunat hajat dan doa selamat;

- v. Semasa Sidang Kemuncak ASEAN ke-36 melalui Persidangan Video pada 26 Jun 2020, Yang Amat Berhormat Perdana Menteri telah menyeru supaya Majlis Keselamatan PBB menentang rancangan Israel untuk mengilhak sebahagian wilayah Tebing Barat; dan
- vi. Di atas permintaan Kerajaan Palestin, Yang Amat Berhormat Perdana Menteri telah merakamkan satu video pada 2 Julai 2020 bagi menyatakan sokongan kepada Kerajaan Palestin menentang keputusan sepihak Israel untuk mengilhak sebahagian Tebing Barat. Kerajaan Palestin memaklumkan bahawa rakaman tersebut akan disiarkan bersama-sama dengan video sokongan daripada pemimpin-pemimpin dunia yang lain.

**Tuan Yang di-Pertua,**

5. Semasa Mesyuarat Tergempar Pertubuhan Kerjasama Islam (OIC) *Open-Ended Virtual Extraordinary Meeting* Peringkat Menteri-Menteri Luar Negeri yang diadakan secara atas talian (*virtual*) pada 10 Jun 2020, Malaysia dan kesemua negara anggota OIC yang hadir ke mesyuarat tersebut telah mengulangi sokongan padu yang berterusan terhadap Palestin serta mengutuk dan menolak tindakan kejam Israel untuk mengilhak tanah milik Palestin di Tebing Barat. Mesyuarat tersebut telah menzahirkan persetujuan sebulat suara kesemua negara anggota OIC untuk menerima pakai resolusi OIC mengenai ancaman Israel mengilhak sebahagian tanah milik Palestin yang dijajah pada 1967 (*threats of the Israeli Occupation Government to Annex Parts of State of Palestine's territory Occupied in 1967*).

**Tuan Yang di-Pertua,**

6. Malaysia berpendirian teguh bahawa penyelesaian terbaik kepada konflik Palestin-Israel hanya boleh dicapai melalui rundingan bagi memastikan keamanan, keselamatan dan kestabilan serantau yang

berkekalan. Justeru, Malaysia akan terus bekerjasama dengan negara-negara rakan yang lain untuk memperjuangkan nasib rakyat Palestin dalam pelbagai fora termasuk dua dala dan pelbagai hala.

7. Sukacita saya tegaskan di dalam Dewan Yang Mulia ini bahawa Malaysia akan senantiasa memainkan peranan aktif dalam usaha mencari penyelesaian yang adil dan berkekalan kepada konflik Palestin-Israel, khususnya ke arah mewujudkan sebuah negara Palestin yang berdaulat dan merdeka.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : YB DATO' IR. AMIRUDDIN BIN HAMZAH**  
**[KUBANG PASU]**  
**TARIKH : 24 OGOS 2020 (ISNIN)**

**SOALAN**

**YB DATO' IR. AMIRUDDIN BIN HAMZAH** minta **PERDANA MENTERI** menyatakan sama ada semua anggota kabinet telah mengisytiharkan harta mereka kepada Suruhanjaya Pencegahan Rasuah Malaysia (SPRM) dan adakah maklumat pengisytiharan harta ini boleh diakses oleh orang awam.

**JAWAPAN : [YB DATO' TAKIYUDDIN BIN HASSAN, MENTERI DI**  
**JABATAN PERDANA MENTERI (PARLIMEN DAN**  
**UNDANG-UNDANG)]**

Tuan Yang di-Pertua,

Untuk makluman Ahli Yang Berhormat, semua Jemaah Menteri telah mengemukakan sesalinan perisytiharan harta kepada Suruhanjaya Pencegahan Rasuah Malaysia (SPRM). Pada masa ini, paparan pengisytiharan harta melalui laman web SPRM hanya akan dibuat setelah Kerajaan memutuskan satu kaedah baru dalam pemaparan mengenai jumlah harta/pendapatan yang telah diisytiharkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN SIM TZE TZIN [BAYAN BARU]**

**TARIKH : 24 OGOS 2020 (ISNIN)**

**SOALAN**

**TUAN SIM TZE TZIN [ BAYAN BARU ]** minta **PERDANA MENTERI** menyatakan sejarah konvensyen Parlimen Westminster dan nyatakan apakah syarat-syarat yang membolehkan usul tidak percaya kepada YAB Perdana Menteri oleh YB Langkawi dibahaskan di dalam Dewan Rakyat. Nyatakan kemungkinan bila usul tersebut akan dibahaskan.

**JAWAPAN: [YB DATO' TAKIYUDDIN BIN HASSAN, MENTERI DI  
JABATAN PERDANA MENTERI (PARLIMEN DAN  
UNDANG-UNDANG)]**

Tuan Yang di-Pertua,

Sebagaimana Ahli Yang Berhormat sedia maklum, usul ahli persendirian daripada Yang Berhormat Langkawi telah dimasukkan di dalam Aturan Urusan Mesyuarat Dewan Rakyat bagi Mesyuarat Kedua, Penggal Ketiga Parlimen Keempat Belas. Usul tersebut adalah tertakluk kepada Peraturan Mesyuarat 14 dan 15(1) Peraturan-Peraturan Majlis Mesyuarat Dewan Rakyat.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK SERI DR. HAJI DZULKEFLY BIN  
AHMAD [ KUALA SELANGOR ]**

**TARIKH : 24 OGOS 2020 ( ISNIN )**

**SOALAN**

**DATUK SERI DR. HAJI DZULKEFLY BIN AHMAD [ KUALA SELANGOR ]** minta **MENTERI KESIHATAN** menyatakan jumlah graduan lepasan bidang perubatan, pergigian dan farmasi yang masih belum ditempatkan dalam Kerajaan. Apakah sebabnya berlaku lambakan graduan yang terpaksa menganggur seterusnya apakah langkah-langkah yang diambil Kementerian untuk menyelesaikan masalah ini.

**JAWAPAN**

**Tuan Yang di-Pertua,**

1. Untuk makluman Ahli Yang Berhormat, jumlah graduan perubatan, pergigian dan farmasi yang telah berdaftar dengan Majlis Perubatan Malaysia dan lulus tapisan oleh Suruhanjaya Perkhidmatan Awam yang belum dilantik secara kontrak bagi menjalani latihan siswazah atau khidmat wajib adalah seperti berikut:

- (a) seramai 1,335 graduan perubatan lulus tapisan SPA selepas 7 Disember 2019 masih belum dilantik bagi menjalani latihan siswazah;

## SOALAN NO. 34

- (b) seramai 415 graduan pergigian lulus tapisan SPA selepas 1 Januari 2020 masih belum dilantik bagi melengkapkan khidmat wajib; dan
  - (c) seramai 196 graduan farmasi lulus tapisan SPA selepas 8 Februari 2020 masih belum dilantik bagi menjalani latihan siswazah.
2. Antara faktor yang menyebabkan tawaran pelantikan belum dikemukakan kepada graduan yang lulus tapisan SPA, khususnya graduan perubatan adalah:
- (a) Slot latihan siswazah sebanyak 12,153 masih diisi dan menunggu untuk dikosongkan dari semasa ke semasa. Ini mengambil kira jumlah keluaran graduan perubatan yang pada masa ini telah mencecah 5,000 hingga 6,000 pada setiap setahun berbanding slot yang boleh ditawarkan; dan
  - (b) terdapat ramai Pegawai Perubatan Siswazah yang tidak dapat menamatkan latihan dalam tempoh dua (2) tahun dan masih perlu melanjutkan latihan siswazah mereka atas pelbagai sebab seperti diluluskan cuti bersalin, diberikan cuti sakit akibat masalah kesihatan dan dilanjutkan latihan kerana isu kompetensi.
3. Bagi memendekkan tempoh menunggu penempatan latihan siswazah dan khidmat wajib ini, Kementerian Kesihatan sentiasa membuat penambahbaikan, antaranya:
- (a) Menambah bilangan Hospital Latihan Siswazah iaitu daripada 38 buah pada 2009 kepada 48 buah pada tahun 2019. Berdasarkan perancangan KKM, sebanyak enam (6) buah hospital lagi dalam proses penelitian untuk pelaksanaan Program Latihan Siswazah dalam tempoh dua (2) tahun akan datang;

## SOALAN NO. 34

- (b) bekerjasama dengan Konsortium Hospital Universiti Awam Malaysia bagi meningkatkan slot penempatan latihan siswazah di Hospital Universiti seperti PPUM, HUKM dan HUSM sehingga 950 slot bagi menampung penempatan Pegawai Perubatan Siswazah Gred UD41 menjalani latihan siswazah;
- (c) Slot latihan siswazah telah ditingkatkan daripada 10,835 pada tahun 2013 kepada 12,153 pada masa ini; dan
- (d) Menambah bilangan disiplin alternatif yang boleh dipilih oleh pegawai iaitu daripada 5 disiplin kepada 9 disiplin termasuk penempatan di klinik kesihatan.

4. Selain daripada langkah tersebut, Kerajaan menerusi Kementerian Pengajian Tinggi telah melanjutkan Moratorium Penawaran Kursus Baru Bidang Perubatan di Institut Pengajian Tinggi (IPT) dalam negara selama 5 tahun lagi iaitu sehingga 2021 yang mana moratorium tersebut meliputi 3 aspek berikut:

- (a) tiada pertambahan universiti kolej perubatan baru;
- (b) tiada pertambahan Program Pengajian Perubatan yang baru; dan
- (c) tiada pertambahan kuota pelajar Pengajian Perubatan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB DATO' SERI ANWAR BN IBRAHIM  
[PORT DICKSON]**

**TARIKH : 24 OGOS 2020 (ISNIN)**

**SOALAN**

**YB DATO' SERI ANWAR BN IBRAHIM** minta **PERDANA MENTERI** menyatakan status terkini penyiasatan Suruhanjaya Pencegahan Rasuah Malaysia (SPRM) mengenai skandal kontrak bernilai tidak kurang RM30 juta Kementerian Kesihatan Malaysia yang berkaitan dengan pemerolehan peralatan untuk COVID-19 yang didakwa diberikan melalui rundingan secara langsung.

**JAWAPAN : [YB DATO' TAKIYUDDIN BIN HASSAN, MENTERI DI  
JABATAN PERDANA MENTERI (PARLIMEN DAN  
UNDANG-UNDANG)]**

Tuan Yang di-Pertua,

Untuk makluman Ahli Yang Berhormat, pihak SPRM sedang menjalankan siasatan berhubung kontrak pemerolehan peralatan untuk COVID-19 yang melibatkan Kementerian Kesihatan Malaysia (KKM). Pada masa ini, SPRM tidak dapat mendedahkan butiran siasatan tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN SIVAKUMAR VARATHARAJU NAIDU  
[BATU GAJAH]**

**TARIKH : 24 OGOS 2020 (ISNIN)**

**SOALAN**

**YB TUAN SIVAKUMAR VARATHARAJU NAIDU** minta **PERDANA MENTERI** menyatakan pembaharuan-pembaharuan yang telah dibawa kepada Suruhanjaya Pencegahan Rasuah Malaysia (SPRM) dari segi kecekapan dan keberkesanan agensi tersebut sejak tahun 2018? Sejauh manakah nilai-nilai kemanusiaan dan hak-hak asasi diberi kepentingan dalam proses penyiasatan yang dikendalikan oleh SPRM.

**JAWAPAN : [YB DATO' TAKIYUDDIN BIN HASSAN, MENTERI DI  
JABATAN PERDANA MENTERI (PARLIMEN DAN  
UNDANG-UNDANG)]**

Tuan Yang di-Pertua,

Untuk makluman Ahli Yang Berhormat, Kerajaan sentiasa mencari jalan baharu dan pendekatan untuk membanteras anasir rasuah bukan sahaja di agensi-agensi kerajaan malahan juga di entiti swasta dan dalam kalangan masyarakat. Dalam negara sedang menangani pandemik COVID-19, SPRM akan terus diperkasakan supaya aktiviti penguatkuasaan dan pencegahan dapat dilaksanakan dengan berkesan untuk meminimalkan ketirisan wang dan penyalahgunaan kuasa.

SPRM juga menambahbaik kaedah penyiasatan dalam kes-kes rasuah dan salahguna kuasa di negara ini. Antara lain ialah melaksanakan pengurusan penyiasatan berkesan dalam kes-kes *High Profile and Public Interest*. Penggunaan kaedah analisa kewangan dan perisikan sedang diperkembangkan lagi kerana jenayah rasuah semakin kompleks.

Pada 1 Jun 2020, Seksyen 17A (Kesalahan oleh Organisasi Komersial) atau dikenali sebagai Liabiliti Korporat telah dikuatkuasakan. Peruntukan ini menetapkan menjadi kesalahan bagi organisasi komersial jika mana-mana pekerja atau pihak bersekutunya melakukan rasuah bagi faedah organisasi terbabit. Seksyen baru di dalam Akta SPRM 2009 ini merupakan peruntukan baharu bagi menambahbaik penguatkuasaan dan operasi siasatan Suruhanjaya ini.

Pelan Anti Rasuah Nasional (NACP) 2019-2023 yang diperkenalkan pada Januari 2019 sebagai aspirasi nasional telah mempertanggungjawabkan SPRM untuk menerajui 12 inisiatif di dalam NACP. Antara inisiatif-inisiatif penting yang diterajui oleh SPRM adalah:-

- a) Memperkasakan SPRM melalui pelantikan Ketua Pesuruhjaya SPRM dan melalui penubuhan Suruhanjaya Perkhidmatan Pencegahan Rasuah (SPPR)
- b) Memasukkan peruntukan baru (*on-going effort*) dalam Akta SPRM 2009 (Akta 694) berhubung cadangan kesalahan-kesalahan baru. Antaranya ialah salahlaku penjawat awam yang menyebabkan ketirisan dan kerugian dana Kerajaan (*MIPO-Misconduct in Public Office*)

Semenjak Suruhanjaya ini ditubuhkan pada 2009, terdapat lima (5) mekanisme diwujudkan yang mana bertindak sebagai *check and balance* terhadap SPRM dalam melaksanakan fungsi dan peranannya. Kelima-lima entiti ini adalah Lembaga Penasihat Pencegahan Rasuah (LPPR), Jawatankuasa Khas Mengenai Rasuah (JKMR) dan



## NO SOALAN : 36

Jawatankuasa Aduan (JA) dibuat melalui peruntukan undang-undang. Manakala pembentukan Panel Penilaian Operasi (PPO) serta Panel Perundingan dan Pencegahan Rasuah (PPPR) dibuat secara pentadbiran.

Pada 30 Jun 2020 yang lalu, SPRM telah membuat perlantikan baru 24 ahli terdiri daripada golongan profesional serta pakar pelbagai bidang yang mewakili pelbagai lapisan masyarakat bagi memantau pelaksanaan fungsi dan operasi SPRM. Kesemua individu tersebut menganggotai LPPR, PPO serta PPPR. Mekanisme ini akan dapat membantu memenuhi harapan masyarakat terhadap kebebasan, kecekapan, keberkesanan, ketelusan dan akauntabiliti Suruhanjaya ini dalam pelaksanaan kewajipan undang-undang yang telah ditetapkan.

Dari segi nilai-nilai kemanusiaan dan hak-hak asasi semasa proses penyiasatan pula, SPRM sentiasa melaksanakan siasatan berlandaskan kepada peruntukan undang-undang dan arahan seperti berikut:-

- i. Perlembagaan Persekutuan;
- ii. S28A, Kanun Tatacara Jenayah (Akta 593) – Hak orang Yang Ditangkap ; dan
- iii. Sistem dan Prosedur Kerja serta Arahan-arahan SPRM berkaitan dengan Temubual Saksi/OKT.

Selain itu, proses soal siasat dan temubual saksi/OKT adalah dibuat di bawah pengawasan CCTV bagi mengelakkan sebarang tohmahan liar daripada mana-mana pihak. Disamping itu juga, SPRM tidak akan berkompromi dengan mana-mana pegawai yang melakukan sebarang salah laku dalam menjalankan tugas-tugas siasatan.

Salahlaku pegawai-pegawai SPRM dipantau oleh Jawatankuasa Aduan (JKA) iaitu salah satu daripada lima entiti bebas yang diwujudkan yang mana bertindak sebagai *check and balance* terhadap SPRM dalam penunaian fungsi dan peranannya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : DR. KELVIN YII LEE WUEN [BANDAR KUCHING]**

**TARIKH : 24 OGOS 2020 (ISNIN)**

**SOALAN**

**TUAN DR. KELVIN YII WUEN [BANDAR KUCHING]** minta **PERDANA MENTERI** menyatakan status terkini perbincangan Jawatankuasa Khas Kabinet untuk segera melaksanakan Perjanjian Malaysia 1963 (MA63) dan juga status penubuhan Jawatankuasa Parlimen untuk memantau pelaksanaan perkara-perkara yang dipersetujui dalam jawatankuasa tersebut.

**JAWAPAN: YB DATO HAJJAH HANIFAH HAJAR TAIB, TIMBALAN MENTERI DI JABATAN PERDANA MENTERI (HAL EHWAL SABAH DAN SARAWAK)**

Assalamualaikum wa rahmatullahi wa barakatuh

Tuan Yang di-Pertua,

Untuk makluman Ahli Yang Berhormat,

1. Kerajaan kini dalam proses akhir dan sedang memuktamadkan cadangan struktur dan komposisi Majlis Khas untuk menyemak pelaksanaan Perjanjian Malaysia 1963 (MA63). Keputusan untuk penubuhan Majlis Khas ini adalah selaras dengan syor dan keputusan Jawatankuasa Khas Kabinet Untuk Menyemak Pelaksanaan Perjanjian Malaysia 1963 (JKKK MA63) yang telah dibubarkan pada 18 November 2019 terdahulu. Dijangka perkara berkenaan penubuhan Majlis Khas ini serta hala tuju baharu semakan pelaksanaan MA63 akan dibawa ke Jemaah Menteri dalam tempoh terdekat. Ini termasuklah antara lain hala

tuju selanjutnya berhubung dengan cadangan untuk semakan Perkara 1(2) Perlembagaan Persekutuan yang mana masih perlu diperbincangkan dengan lebih lanjut sebelum Jemaah Menteri membuat sebarang keputusan mengenainya. Melalui penubuhan Majlis Khas ini, Kerajaan berpandangan tiada keperluan untuk Jawatankuasa Parlimen ditubuhkan bagi memantau semakan pelaksanaan MA63 seperti yang dibangkitkan oleh Ahli Yang Berhormat.

2. Berhubung dengan status semasa pelaksanaan 17 daripada 21 perkara yang telah dibentang dalam JKKK MA63, secara umumnya, agensi-agensi yang bertanggungjawab dijangka memerlukan tempoh sekitar 1-2 tahun untuk melaksanakan keputusan-keputusan tersebut. Manakala baki 4 perkara yang belum selesai seperti **Royalti Minyak dan Bayaran Tunai Petroleum, Mineral Minyak dan Medan Minyak, Akta Laut Wilayah 2012 [Akta 750] dan Akta Pelantar Benua 1966 [Akta 83]** akan diteruskan perbincangan selanjutnya dalam Majlis Khas yang bakal ditubuhkan kelak.

3. Kerajaan yakin bahawa kejayaan dalam agenda ini akan meredakan ketidak-puasan hati rakyat di negeri Sabah dan Sarawak yang selama ini merenggangkan perpaduan dan integriti wilayah yang kukuh serta sekaligus akan dapat memperkasakan patriotisma dan nasionalisma negara bangsa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN WONG HON WAI  
[BUKIT BENDERA]**

**TARIKH : 24 OGOS 2020 (ISNIN)**

**SOALAN**

**YB TUAN WONG HON WAI (BUKIT BENDERA)** minta **PERDANA MENTERI** menyatakan sejajar dengan pengumuman Kabinet Perikatan Nasional bahawa semua Menteri wajib mengisytiharkan harta sebulan selepas pelantikan, apakah status pelaksanaannya dan kenapa gagal dipaparkan di laman web SPRM secara telus.

**JAWAPAN : [YB DATO' TAKIYUDDIN BIN HASSAN, MENTERI DI  
JABATAN PERDANA MENTERI (PARLIMEN DAN  
UNDANG-UNDANG)]**

Tuan Yang di-Pertua,

Untuk makluman Ahli Yang Berhormat, semua Jemaah Menteri telah mengemukakan sesalanan perisytiharan harta kepada Suruhanjaya Pencegahan Rasuah Malaysia (SPRM). Pada masa ini, paparan pengisytiharan harta melalui laman web SPRM hanya akan dibuat setelah Kerajaan memutuskan satu kaedah baru dalam pemaparan mengenai jumlah harta/pendapatan yang telah diisytiharkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN SU KEONG SIONG [ KAMPAR ]**

**TARIKH : 24 OGOS 2020 (ISNIN)**

**SOALAN**

**TUAN SU KEONG SIONG [ KAMPAR ]** minta **PERDANA MENTERI** menyatakan kesan dan impak terhadap ekonomi negara akibat penularan pandemik COVID-19. Apakah langkah-langkah dan pelan pemulihan pasca COVID-19 yang diambil untuk memperkukuhkan ekonomi negara.

**JAWAPAN**

**YB DATO' SRI MUSTAPA BIN MOHAMED,  
MENTERI DI JABATAN PERDANA MENTERI (EKONOMI)**

**Tuan Yang di-Pertua,**

1. Untuk makluman Ahli Yang Berhormat, pandemik COVID-19 telah memberi kesan yang amat ketara kepada ekonomi negara. Pertumbuhan keluaran dalam negeri kasar (KDNK) bagi separuh pertama tahun 2020 mencatatkan penguncupan sebanyak 8.3% [S1' 20: 0.7%; S2' 20: -17.1%]. Penguncupan ini adalah disebabkan oleh langkah yang diambil bagi membendung penyebaran pandemik COVID-19, termasuk pelaksanaan Perintah Kawalan Pergerakan sejak 18 Mac 2020. Semua sektor utama ekonomi seperti perkhidmatan, pembuatan dan pembinaan telah terjejas akibat penularan wabak ini.

2. Pertumbuhan ekonomi dijangka bertambah baik pada separuh kedua tahun ini ditunjukkan oleh beberapa indikator ekonomi yang semakin pulih seperti perdagangan borong dan runcit, jualan kenderaan penumpang dan kadar purata penginapan hotel. Pertumbuhan ekonomi bagi tahun ini dianggarkan bertumbuh di antara -5.5% hingga -3.5%. Pemulihan sepenuhnya ekonomi negara dijangka akan dicapai pada tahun 2021 dengan jangkaan pertumbuhan di antara 5.5% hingga 8%. Jangkaan ini adalah seiring dengan Tabung Kewangan Antarabangsa dan Bank Dunia yang mengunjurkan KDNK Malaysia bertumbuh sebanyak 6.3% dan 6.9% pada tahun hadapan.

3. Kesan pandemik COVID-19 yang terpaksa ditanggung oleh rakyat adalah cukup berat. Di samping terdapat pekerja di syarikat swasta yang terpaksa diberhentikan, pekerja di sektor informal seperti peniaga pasar malam dan penjaja juga tidak dapat keluar untuk mencari rezeki semasa tempoh Perintah Kawalan Pergerakan (PKP) yang lalu. Malahan, ada juga Perusahaan Kecil dan Sederhana (PKS) termasuk peniaga kecil-kecilan yang terpaksa menutup terus perniagaan mereka kerana tidak dapat menanggung kerugian yang berterusan. Ini sekaligus menyebabkan pendapatan rakyat berkurangan, terutamanya golongan B40 yang memerlukan bantuan Kerajaan untuk meneruskan kehidupan. Justeru, Kerajaan dengan sedaya upaya akan terus membela nasib rakyat seperti keluarga Makcik Kiah bagi memastikan tiada golongan yang tercicir dalam menikmati manfaat daripada pakej rangsangan ekonomi peduli rakyat ini.

4. Selain daripada itu, pandemik COVID-19 telah mengubah kehidupan dan gaya hidup rakyat Malaysia kepada norma baharu dalam amalan kerja dan interaksi sosial. Amalan bekerja dari rumah kini sudah menjadi kebiasaan dalam memastikan kelangsungan operasi perniagaan dan perkhidmatan Kerajaan. Selain itu, pelaksanaan waktu bekerja anjal, penggiliran kerja di pejabat, pertukaran syif kerja, tugas kerja berasaskan projek dan sebagainya telah mula diperkenalkan. Pandemik ini juga telah mempercepatkan lagi penggunaan platform digital dalam bidang perniagaan dan perdagangan, pendidikan serta komunikasi.

**Tuan Yang di-Pertua,**

5. Dalam usaha untuk memulihkan ekonomi negara yang terjejas kesan daripada pandemik COVID-19 ini, Kerajaan telah membuat perancangan berdasarkan enam pendekatan utama iaitu Ketegasan (*Resolve*), Ketahanan (*Resilience*), Memulakan Semula (*Restart*), Pemulihan (*Recovery*), Memperkasa (*Revitalise*) dan Menyusun Semula (*Reform*). Enam pendekatan utama ini adalah bagi memastikan ekonomi dapat kembali berada pada landasan pertumbuhan yang mampan. Pelaksanaan PKP yang bermula pada 18 Mac 2020 merupakan pendekatan pertama iaitu Ketegasan (*Resolve*), yang telah menyumbang kepada kejayaan Kerajaan membendung penularan pandemik COVID-19 dalam negara.

6. Untuk makluman Ahli Yang Berhormat, di bawah pendekatan kedua iaitu Ketahanan (*Resilience*), Kerajaan telah memperkenalkan Pakej Rangsangan Ekonomi Prihatin Rakyat (PRIHATIN) yang berjumlah RM260 bilion pada Mac 2020 bagi menjaga kesejahteraan rakyat, menyokong kelestarian perniagaan, khususnya perusahaan kecil dan sederhana (PKS), dan memastikan kelangsungan kegiatan ekonomi utama. PRIHATIN yang bernilai 19% kepada KDNK adalah antara pakej rangsangan yang terbesar di kalangan negara membangun.

7. Di bawah pendekatan ketiga iaitu Memulakan Semula (*Restart*), Kerajaan telah memulakan semula ekonomi secara meluas dalam keadaan yang terkawal dan teratur. Sebahagian besar sektor ekonomi dibuka semula, namun sektor serta aktiviti yang melibatkan perhimpunan rakyat secara beramai-ramai tidak dibenarkan.

**Tuan Yang di-Pertua,**

8. Di bawah pendekatan yang seterusnya iaitu Pemulihan (*Recovery*), Kerajaan telah memperkenalkan Pelan Jana Semula Ekonomi Negara (PENJANA) bernilai RM35 bilion pada Jun 2020. PENJANA memberi fokus kepada tiga teras utama, iaitu untuk memperkasakan rakyat, melonjakkan perniagaan dan merangsang ekonomi. Ianya merangkumi langkah-langkah untuk melindungi pekerjaan, mempromosikan pekerjaan

serta membolehkan perniagaan mengekalkan operasi dan meningkatkan produktiviti secara beransur-ansur.

9. Untuk makluman Ahli Yang Berhormat juga, di bawah pendekatan kelima dan keenam, Memperkasa (Revitalize) dan Menyusun Semula (Reform), Kerajaan melalui Majlis Tindakan Ekonomi (EAC) sedang dalam proses penyediaan pelan pemulihan ekonomi jangka sederhana hingga panjang. Pelan ini akan dibentangkan pada bulan Oktober 2020 memberi tumpuan kepada penambahbaikan dalam pasaran buruh, penambahbaikan peraturan dan pengukuhan persaingan dalam pasaran, isu pelaburan berkualiti, reformasi institusi awam dan kerangka urus tadbir serta pelaksanaan pendigitalan dan Revolusi Perindustrian Keempat. Selain daripada itu, peranan sektor awam dan swasta juga akan diteliti semula dalam menyokong pertumbuhan dan kelestarian ekonomi Malaysia dalam jangka masa panjang.

10. Rancangan Malaysia Kedua Belas (RMKe-12) yang pada awalnya dijadualkan 6 Ogos 2020 di Dewan Rakyat telah ditangguhkan kepada tahun hadapan bagi membolehkan Kerajaan mengambil kira keadaan ekonomi semasa negara yang terkesan teruk akibat pandemik COVID-19 dalam merangka dasar dan strategi pembangunan jangka sederhana. Bagi tujuan tersebut, Kerajaan juga sedang giat mengadakan semula libat urus bersama semua pihak berkepentingan, termasuk kementerian dan agensi Kerajaan Persekutuan, kerajaan negeri, pihak swasta, badan antarabangsa dan akademik.

11. Kerajaan percaya bahawa dengan pendekatan dan langkah yang telah diambil untuk menangani kesan daripada pandemik COVID-19, ekonomi negara akan kembali kukuh bagi memastikan kebajikan dan kesejahteraan rakyat terus terpelihara.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB DATO' JOHARI BIN ABDUL  
[SUNGAI PETANI]**

**TARIKH : 24 OGOS 2020 (ISNIN)**

**SOALAN**

**YB DATO' JOHARI BIN ABDUL [SUNGAI PETANI]** minta **PERDANA MENTERI** menyatakan sudahkah semua anggota kabinet Kerajaan kini mengisytiharkan harta mereka kepada Suruhanjaya Pencegahan Rasuah Malaysia. Jika telah diisytiharkan, bolehkah maklumat ini diakses oleh orang awam.

**JAWAPAN : [YB DATO' TAKIYUDDIN BIN HASSAN,  
MENTERI DI JABATAN PERDANA MENTERI  
(PARLIMEN DAN UNDANG-UNDANG)]**

Tuan Yang di-Pertua,

Untuk makluman Ahli Yang Berhormat, semua Jemaah Menteri telah mengemukakan sesalinan perisytiharan harta kepada Suruhanjaya Pencegahan Rasuah Malaysia (SPRM). Pada masa ini, paparan pengisytiharan harta melalui laman web SPRM hanya akan dibuat setelah Kerajaan memutuskan satu kaedah baru dalam pemaparan mengenai jumlah harta/pendapatan yang telah diisytiharkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN HASSAN BIN ABDUL KARIM  
[ PASIR GUDANG ]**

**TARIKH : 24 OGOS 2020 (ISNIN)**

**SOALAN**

**TUAN HASSAN BIN ABDUL KARIM [ PASIR GUDANG ]** minta **PERDANA MENTERI** menyatakan menjelaskan apakah rancangan-rancangan pemulihan ekonomi yang dilakukan oleh Kerajaan untuk memperbaiki ekonomi Malaysia yang terjejas teruk akibat wabak COVID-19.

**JAWAPAN**

**YB DATO' SRI MUSTAPA BIN MOHAMED,  
MENTERI DI JABATAN PERDANA MENTERI (EKONOMI)**

**Tuan Yang di-Pertua,**

1. Untuk makluman Ahli Yang Berhormat, pandemik COVID-19 telah memberi kesan yang amat ketara kepada ekonomi negara. Pertumbuhan keluaran dalam negeri kasar (KDNK) bagi separuh pertama tahun 2020 mencatatkan penguncupan sebanyak 8.3% [S1' 20: 0.7%; S2' 20 : - 17.1%]. Penguncupan ini adalah disebabkan oleh langkah yang diambil bagi membendung penyebaran pandemik COVID-19, termasuk pelaksanaan Perintah Kawalan Pergerakan sejak 18 Mac 2020. Semua sektor utama ekonomi seperti perkhidmatan, pembuatan dan pembinaan telah terjejas akibat penularan wabak ini.

2. Pertumbuhan ekonomi dijangka bertambah baik pada separuh kedua tahun ini ditunjukkan oleh beberapa indikator ekonomi yang semakin pulih seperti perdagangan borong dan runcit, jualan kenderaan penumpang dan kadar purata penginapan hotel. Pertumbuhan ekonomi bagi tahun ini dianggarkan bertumbuh di antara -5.5% hingga -3.5%. Pemulihan sepenuhnya ekonomi negara dijangka akan dicapai pada tahun 2021 dengan jangkaan pertumbuhan di antara 5.5% hingga 8%. Jangkaan ini adalah seiring dengan Tabung Kewangan Antarabangsa dan Bank Dunia yang mengunjurkan KDNK Malaysia bertumbuh sebanyak 6.3% dan 6.9% pada tahun hadapan.

3. Kesan pandemik COVID-19 yang terpaksa ditanggung oleh rakyat adalah cukup berat. Di samping terdapat pekerja di syarikat swasta yang terpaksa diberhentikan, pekerja di sektor informal seperti peniaga pasar malam dan penjaja juga tidak dapat keluar untuk mencari rezeki semasa tempoh Perintah Kawalan Pergerakan (PKP) yang lalu. Malahan, ada juga Perusahaan Kecil dan Sederhana (PKS) termasuk peniaga kecil-kecilan yang terpaksa menutup terus perniagaan mereka kerana tidak dapat menanggung kerugian yang berterusan. Ini sekaligus menyebabkan pendapatan rakyat berkurangan, terutamanya golongan B40 yang memerlukan bantuan Kerajaan untuk meneruskan kehidupan. Justeru, Kerajaan dengan sedaya upaya akan terus membela nasib rakyat seperti keluarga Makcik Kiah bagi memastikan tiada golongan yang tercicir dalam menikmati manfaat daripada pakej rangsangan ekonomi peduli rakyat ini.

4. Selain daripada itu, pandemik COVID-19 telah mengubah kehidupan dan gaya hidup rakyat Malaysia kepada norma baharu dalam amalan kerja dan interaksi sosial. Amalan bekerja dari rumah kini sudah menjadi kebiasaan dalam memastikan kelangsungan operasi perniagaan dan perkhidmatan Kerajaan. Selain itu, pelaksanaan waktu bekerja anjal, penggiliran kerja di pejabat, pertukaran syif kerja, tugas kerja berasaskan projek dan sebagainya telah mula diperkenalkan. Pandemik ini juga telah mempercepatkan lagi penggunaan platform digital dalam bidang perniagaan dan perdagangan, pendidikan serta komunikasi.

**Tuan Yang di-Pertua,**

5. Dalam usaha untuk memulihkan ekonomi negara yang terjejas kesan daripada pandemik COVID-19 ini, Kerajaan telah membuat perancangan berdasarkan enam pendekatan utama iaitu Ketegasan (*Resolve*), Ketahanan (*Resilience*), Memulakan Semula (*Restart*), Pemulihan (*Recovery*), Memperkasa (*Revitalise*) dan Menyusun Semula (*Reform*). Enam pendekatan utama ini adalah bagi memastikan ekonomi dapat kembali berada pada landasan pertumbuhan yang mampan. Pelaksanaan PKP yang bermula pada 18 Mac 2020 merupakan pendekatan pertama iaitu Ketegasan (*Resolve*), yang telah menyumbang kepada kejayaan Kerajaan membendung penularan pandemik COVID-19 dalam negara.

6. Untuk makluman Ahli Yang Berhormat, di bawah pendekatan kedua iaitu Ketahanan (*Resilience*), Kerajaan telah memperkenalkan Pakej Rangsangan Ekonomi Prihatin Rakyat (PRIHATIN) yang berjumlah RM260 bilion pada Mac 2020 bagi menjaga kesejahteraan rakyat, menyokong kelestarian perniagaan, khususnya perusahaan kecil dan sederhana (PKS), dan memastikan kelangsungan kegiatan ekonomi utama. PRIHATIN yang bernilai 19% kepada KDNK adalah antara pakej rangsangan yang terbesar di kalangan negara membangun.

7. Di bawah pendekatan ketiga iaitu Memulakan Semula (*Restart*), Kerajaan telah memulakan semula ekonomi secara meluas dalam keadaan yang terkawal dan teratur. Sebahagian besar sektor ekonomi dibuka semula, namun sektor serta aktiviti yang melibatkan perhimpunan rakyat secara beramai-ramai tidak dibenarkan.

**Tuan Yang di-Pertua,**

8. Di bawah pendekatan yang seterusnya iaitu Pemulihan (*Recovery*), Kerajaan telah memperkenalkan Pelan Jana Semula Ekonomi Negara (PENJANA) bernilai RM35 bilion pada Jun 2020. PENJANA memberi fokus kepada tiga teras utama, iaitu untuk memperkasakan rakyat, melonjakkan perniagaan dan merangsang ekonomi. Ianya merangkumi langkah-langkah untuk melindungi pekerjaan, mempromosikan pekerjaan

serta membolehkan perniagaan mengekalkan operasi dan meningkatkan produktiviti secara beransur-ansur.

9. Untuk makluman Ahli Yang Berhormat juga, di bawah pendekatan kelima dan keenam, Memperkasa (Revitalize) dan Menyusun Semula (Reform), Kerajaan melalui Majlis Tindakan Ekonomi (EAC) sedang dalam proses penyediaan pelan pemulihan ekonomi jangka sederhana hingga panjang. Pelan ini akan dibentangkan pada bulan Oktober 2020 memberi tumpuan kepada penambahbaikan dalam pasaran buruh, penambahbaikan peraturan dan pengukuhan persaingan dalam pasaran, isu pelaburan berkualiti, reformasi institusi awam dan kerangka urus tadbir serta pelaksanaan pendigitalan dan Revolusi Perindustrian Keempat. Selain daripada itu, peranan sektor awam dan swasta juga akan diteliti semula dalam menyokong pertumbuhan dan kelestarian ekonomi Malaysia dalam jangka masa panjang.

10. Rancangan Malaysia Kedua Belas (RMKe-12) yang pada awalnya dijadualkan 6 Ogos 2020 di Dewan Rakyat telah ditangguhkan kepada tahun hadapan bagi membolehkan Kerajaan mengambil kira keadaan ekonomi semasa negara yang terkesan teruk akibat pandemik COVID-19 dalam merangka dasar dan strategi pembangunan jangka sederhana. Bagi tujuan tersebut, Kerajaan juga sedang giat mengadakan semula libat urus bersama semua pihak berkepentingan, termasuk kementerian dan agensi Kerajaan Persekutuan, kerajaan negeri, pihak swasta, badan antarabangsa dan akademik.

11. Kerajaan percaya bahawa dengan pendekatan dan langkah yang telah diambil untuk menangani kesan daripada pandemik COVID-19, ekonomi negara akan kembali kukuh bagi memastikan kebajikan dan kesejahteraan rakyat terus terpelihara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK LIEW VUI KEONG [BATU SAPI]**

**TARIKH : 24 OGOS 2020 (ISNIN)**

**SOALAN**

**DATUK LIEW VUI KEONG [ BATU SAPI ]** minta **PERDANA MENTERI** menyatakan status terkini 4 isu yang belum dipersetujui daripada 21 isu yang dikenalpasti bagi melaksanakan Perjanjian Malaysia 1963 (MA63) sepenuhnya untuk mengembalikan hak dan status Sabah dan Sarawak sebagai rakan kongsi bersama dalam Persekutuan Malaysia.

**JAWAPAN: YB DATO HAJJAH HANIFAH HAJAR TAIB, TIMBALAN MENTERI DI JABATAN PERDANA MENTERI (HAL EHWAL SABAH DAN SARAWAK)**

Assalamualaikum wa rahmatullahi wa barakatuh

Tuan Yang di-Pertua,

Untuk makluman Ahli Yang Berhormat,

1. Kerajaan kini dalam proses akhir dan sedang memuktamadkan cadangan struktur dan komposisi Majlis Khas untuk menyemak pelaksanaan Perjanjian Malaysia 1963 (MA63). Keputusan untuk penubuhan Majlis Khas ini adalah selaras dengan syor dan keputusan Jawatankuasa Khas Kabinet Untuk Menyemak Pelaksanaan Perjanjian Malaysia 1963 (JKKK MA63) yang telah dibubarkan pada 18 November 2019 terdahulu. Dijangka perkara berkenaan penubuhan Majlis Khas ini

serta hala tuju baharu semakan pelaksanaan MA63 akan dibawa ke Jemaah Menteri dalam tempoh terdekat. Ini termasuklah antara lain hala tuju selanjutnya berhubung dengan cadangan untuk semakan Perkara 1(2) Perlembagaan Persekutuan Persekutuan yang mana masih perlu diperbincangkan dengan lebih lanjut sebelum Jemaah Menteri membuat sebarang keputusan mengenainya.

2. Berhubung dengan status semasa pelaksanaan 17 daripada 21 perkara yang telah dibentang dalam JKKK MA63, secara umumnya, agensi-agensi yang bertanggungjawab dijangka memerlukan tempoh sekitar 1-2 tahun untuk melaksanakan keputusan-keputusan tersebut. Manakala baki 4 perkara yang belum selesai seperti **Royalti Minyak dan Bayaran Tunai Petroleum, Mineral Minyak dan Medan Minyak, Akta Laut Wilayah 2012 [Akta 750] dan Akta Pelantar Benua 1966 [Akta 83]** akan diteruskan perbincangan selanjutnya dalam Majlis Khas yang bakal ditubuhkan kelak.

3. Kerajaan yakin bahawa kejayaan dalam agenda ini akan meredakan ketidak-puasan hati rakyat di negeri Sabah dan Sarawak yang selama ini merenggangkan perpaduan dan integriti wilayah yang kukuh serta sekaligus akan dapat memperkasakan patriotisma dan nasionalisma negara bangsa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN KESAVAN A/L SUBRAMANIAM  
[SUNGAI SIPUT]**

**TARIKH : 24 OGOS 2020 (ISNIN)**

**SOALAN**

Minta **PERDANA MENTERI** menyatakan dalam membantu mengurangkan jurang pendapatan di antara kawasan luar bandar dan bandar, apakah pelan-pelan tindakan yang telah dilaksanakan oleh pihak NCER (Northern Corridor) untuk membantu dalam mengurangkan jurang pendapatan ini khususnya di Kawasan Sungai Siput. Apakah program-program yang akan dilaksanakan untuk membantu meningkatkan pengaliran masuk pengusaha-pengusaha untuk melabur di kawasan Sungai Siput.

**JAWAPAN**

**YB DATO' SRI MUSTAPA BIN MOHAMED,  
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Selaras dengan objektif Wawasan Kemakmuran Bersama 2030, Kerajaan sentiasa berusaha memastikan pembangunan sosioekonomi dinikmati oleh semua lapisan masyarakat merentasi wilayah, negeri dan daerah. Pelbagai program telah dirancang dan dilaksanakan bagi mengurangkan jurang pendapatan antara bandar dan luar bandar di samping pelbagai inisiatif bagi menarik lebih banyak pelaburan ke negeri Perak, termasuklah di kawasan Sungai Siput.



2. Untuk makluman Yang Berhormat, pendapatan penengah bulanan isi rumah bagi negeri Perak telah meningkat daripada RM4,006 pada tahun 2016 kepada RM4,273 pada tahun 2019. Jurang pendapatan antara kawasan bandar dan luar bandar bagi negeri Perak juga telah berkurangan iaitu daripada 1:0.76 pada tahun 2016 kepada 1:XX pada tahun 2019.

3. Bagi mengurangkan jurang pendapatan antara kawasan bandar dan luar bandar di Wilayah Ekonomi Koridor Utara (NCER) khususnya di negeri Perak, Kerajaan melalui Pihak Berkuasa Pelaksanaan Koridor Utara (NCIA) telah melaksanakan pelbagai program pembangunan modal insan dan keusahawanan. Program pembangunan modal insan merupakan pendekatan Kerajaan bagi meningkatkan status sosio-ekonomi kumpulan isi rumah B40 yang mensasarkan golongan ibu tunggal, graduan menganggur, belia dan Orang Asli. Di kawasan Sungai Siput secara khususnya, antara inisiatif yang telah dilaksanakan pada tahun 2016 sehingga 2017 adalah program latihan kemahiran dan keusahawanan dalam bidang pertanian moden (fertifasi) dan bakeri yang memberi manfaat kepada 250 peserta dengan purata peningkatan pendapatan bersih sebanyak RM1,500 sebulan.

4. Bagi menarik pelaburan swasta dari dalam dan luar negara ke kawasan luar bandar di kawasan NCER, antara inisiatif yang dilaksanakan oleh Kerajaan ialah penyediaan pakej insentif pelaburan. Bagi negeri Perak, daerah Kuala Kangsar yang merangkumi kawasan Sungai Siput telah disenaraikan sebagai antara kawasan insentif khas (*Special Promoted Area*) di bawah Pakej Insentif Cukai NCER (*NCER Tax Incentives Package*). Di bawah pakej ini, syarikat-syarikat pelabur yang layak di bawah kategori taraf perintis boleh mendapat pengecualian cukai sehingga 100 peratus bagi tempoh 15 tahun. Manakala syarikat pelabur lain yang layak, boleh menerima 100 peratus elaun cukai pelaburan sehingga 10 tahun. Insentif sebegini dijangka dapat menarik lebih banyak pelaburan ke kawasan luar bandar dan seterusnya mewujudkan lebih banyak peluang pekerjaan serta merapatkan jurang pembangunan antara bandar dan luar bandar.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN SIM CHEE KEONG [BUKIT MERTA JAM]**

**TARIKH : 24 OGOS 2020 (ISNIN)**

**SOALAN**

**TUAN SIM CHEE KEONG [ BUKIT MERTA JAM ]** minta **PERDANA MENTERI** menyatakan status pengangguran belia dan guna tenaga tidak penuh (underemployment) belia mengikut pecahan kebangsaan, negeri, umur, gender dan kelulusan akademik.

**JAWAPAN**

**YB DATO' SRI MUSTAPA BIN MOHAMED,  
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Untuk makluman Ahli Yang Berhormat, kadar pengangguran belia pada Mei 2020 adalah 10.0 peratus, meningkat 1.0 mata peratus berbanding April 2020 yang mencatatkan kadar pengangguran 9.0 peratus. Dari segi bilangan, penganggur belia yang berumur 15-30 tahun pada Mei 2020 direkodkan sebanyak 573.7 ribu orang.
2. Pengangguran belia mengikut jantina pula menunjukkan kadar pengangguran belia lelaki adalah 9.6 peratus dengan bilangan penganggur sebanyak 340.1 ribu orang. Sementara itu, kadar pengangguran belia perempuan adalah 10.6 peratus dengan bilangan sebanyak 233.5 ribu orang.

3. Majoriti penganggur belia mempunyai kelulusan akademik peringkat menengah dengan bilangan penganggur pada Mei 2020 seramai 254.6 ribu orang yang merangkumi 44.4 peratus keseluruhan penganggur belia.
4. Menjawab kepada persoalan mengenai guna tenaga tidak penuh (*Underemployment*) dalam kalangan belia, statistik menunjukkan 140.6 ribu belia bekerja kurang daripada 30 jam pada Mei 2020. Bilangan ini didapati menurun berbanding April 2020 yang mencatatkan seramai 616.6 ribu orang. Penurunan ini berikutan daripada peralihan pelaksanaan Perintah Kawalan Pergerakan (PKP) kepada PKP Bersyarat bermula 4 Mei 2020 sehingga 9 Jun 2020.
5. Pada tahun 2019, kadar pengangguran belia mengikut negeri menunjukkan sebanyak enam negeri yang merekodkan kadar pengangguran belia di atas paras kadar pengangguran belia nasional. Kadar pengangguran belia tertinggi dicatatkan oleh Wilayah Persekutuan Labuan dengan kadar 11.5 peratus. Manakala Negeri Melaka mencatatkan kadar pengangguran terendah pada kadar 2.3 peratus.

Sekian, terima kasih.

**PEMBERITAHUAN PERTANYAAN DEWAN RAKYAT,  
MESYUARAT KEDUA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' HAJI MAHFUZ BIN HAJI OMAR  
(POKOK SENA)**

**TARIKH : 24 OGOS 2020 (ISNIN)**

**SOALAN**

Minta **MENTERI PERTAHANAN** menyatakan sama ada wujud apa-apa siasatan 'money trail' dibuat terhadap pembayaran RM555 juta oleh Lembaga Tabung Angkatan Tentera (LTAT) untuk pembelian saham-saham syarikat yang mendapat konsesi Sistem Penguatkuasaan Automatik (AES), dan jika ada apakah status siasatan tersebut.

**JAWAPAN**

Tuan Yang di-Pertua,

Siasatan ke atas projek Sistem Penguatkuasaan Automatik (AES) telah dibuat oleh pihak Suruhanjaya Pencegahan Rasuah Malaysia (SPRM) pada awal tahun 2019. Sehingga kini, tiada perkembangan lanjut yang dimaklumkan kepada Lembaga Tabung Angkatan Tentera (LTAT) berkenaan status siasatan tersebut.

Terima kasih.